

Februari 26, 2019

www.awemainta.com

www.facebook.com/awemainta

noticia@awemainta.com


583-1400



AWEMainta

15
año

Honda a bolter door di velocidad halto riba Sasaki



DIALUNA anochi esnan den area di Tat Fat situa ariba Sasaki a tende un zonido fuerte. Algun minuut despues informacion a drenta cu un auto a bolter. Mesora varios unidad di polis y tambe ambulance a cuminsa bay e area unda e accidente a sosode. Na yegada ta constata cu ta trata di tres dama den un Honda, cu a posiblemente door di velocidad halto a baha caminda parti pariba y bolter.

Un di nan tawata keha di poco dolor na curpa, pero nada grave. Ambulance mientrastanto tawata yegando pa atende cu nan.

Segun nan version, un auto lo a brake nan dilanti, causando cu nan a perde control y bolter banda rechts di caminda. Loke ta importante cu nan a sali ok di e accidente aki cu por tawata hopi serio mes, si ela dal contra un palo di luz.

**Un caos den
criminalidad pero ta
prefera controla trafico**

Pagina 3

Mientras mas caso di inmoralidad di
adulto cu menor ta bini dilanti
Pueblo ta exige castigo mas halto

Pagina 2

Mientras mas caso di inmoralidad di adulto cu menor ta bini dilanti

Pueblo ta exige castigo mas halto



E hecho cu un menor por ta un ‘víctima’ cu a duna su consentimiento den un relacion cu un persona mayor di edad, of adulto grandi, no ta haci esaki aceptabel pa comunidad na Aruba. E por ta aceptabel na Holanda, pero aki sigur cu no. Esaki basa riba e reaccion y comentarionan di e ultimo caso di e indole aki cu a bira publico e siman aki. Un homber adulto cu a haci mal uzo di un mucha muhe di 12 añanan.

E caso aki tabatin su consecuencianan hopi mas grave ora cu den e mas ultimo caso denuncia, un tata kende no tabata por cu e sucedido a pone fin na su bida. Na momento cu e tata a bebe e veneno hopi hende no por a compronde pakico di un situacion asina drastico. Pero poco-poco informacion a cuminsa sali di pakico un tata a tuma un decision asina drastico: un colega di dje mes, cu kende e tabatin hopi confiansa, pa lague transporta su yiu menor di edad a haci actonan di inmoralidad cun’e.

E tata asina cu el a tende di loke a pasa a dicidi di haci un denuncia contra su colega, pero pa motibo di investigacion cu mester a wordo haci, no por a detene e otro chauffeur di bus mesora. Mester a acumula prueba pa despues bay na interrogacion y detencion.

Mester ta cla pa tur hende cu aki na Aruba ta contra ley pa un persona adulto 18 aña bay ariba tene un of otro tipo di acto sexual cu un persona menor di 16 aña, inclusive cu consentimiento di e menor di edad e ta keda ilegal.

Hustamente pa protege e menornan di edad, cu kisas ta desaroya hopi lihe, pero cu mentalmente esaki no ta e caso, tin e provision den ley aki. Un adulto, den e caso aki un homber cu a biba su bida caba sa cu loke el a haci cu un menor di edad, ni si e mes a provok’e, no ta aceptabel den leyman di Aruba.

Pero ta parce, segun AWEMainta por a compronde, e caso aki tin un rabo mas largo, pasobra ta menciona cu tin 5 persona (homber) mas

envolvi kendenan lo a laga e mucha muhe di 12 aña haci algo sexual cu nan, cual si keda comproba ta muestra cu simplemente nan a uze pa nan propio satisfaccion sexual.

Segun e portal di noticia 24ora.com, e chauffeur di bus ta deteni pa interrogacion. Loke ta conoci sigur ta cu e ta un persona hopi mas grandi cu yiu di e denunciante, tabata casa y ta divorcia.

Segun por a compronde, e hobencita di 12 aña tabata haci uzo di e transporte di su bus pa yega su destinacion. Y e tata a confia den dje pa hiba su yiu ora cu e mester bay un caminda. Probablemente esey ta loke a traha riba e tata cu dicidi di pone fin na su bida, sintiendo su mes responsabel pa loke cu a pasa.

E reaccionnan ricibi despues di e caso aki tabata hopi. Mayoria di e comentarionan tabata cu e castigo cu ta wordo duna ta demasiado tiki pa descurasha hombernan scapa di comete e tipo di actonan aki. Tur pais tin ley basa riba pensamiento di e sociedad, y na Aruba ta visibel cu e dos tipo di delitonan cu mas ta wordo condena ta e relacion of actonan sexual cu menor y violencia domestico. E ta un señal cu aunke no por drecha loke cu a pasa mas, e necesidad t’ey pa aumenta e castigonan aki na normanan cu ta aceptabel pa e comunidad. Pa comunidad di Aruba e inocencia di un menor di edad mester protegi te ora cu e mes por dicidi cu pleno huicio kico ta bon p’e of no.

Investigacion den e caso aki lo sigui.

Hincamento y tiramento rond y hasta den KIA

Un caos den criminalidad pero ta prefera controla trafico

TA parece cu un biaha mas ta keda demostra cu concentracion den maneho di husticia ta poni den e caminda robes. Ta ordena pa tur dia tin control den trafico, no cu e meta pa baha cantidad di acciden- tenan fatal pasobra esaki pa algun aña caba ta abou pero simplemente pa parti mas tanto boet posibel y Gobierno haya mas entrada den caha.

Pero poniendo enfasis ta lubida riba otro areanan di proteccion pa pueblo. Asina por ehempel ta lubida cu e ciudadano kier sinti su mes protegi den su cas of cu su cas ta protegi ora cu e ta trahando. Pero tin casonan di violencia aumentando, manera uzo di arma di candela y hincamento hasta den KIA. Esaki ta nifica cu e control cu awo ta tuma luga den trafico mester move pa mira con por ta posibel cu tin arma y celular den KIA. Ta un secreto publico cu negoshinan di droga ta sigui wordo haci for di KIA. E cambio den KIA asina hopi priminti te ainda no ta visibel. E unico splicacion cu di e Minister "dinamismo" (palabra cu semper e ta uza) ta cu tin e reto financiero. Mientrastanto ta sigui drenta cosnan ilegal den KIA y hincamento manera a tuma luga den fin di siman. T'asina cu diadomingo ultimo ora cu un gran parti di pueblo ta celebrando Parada di Mucha na San Nicolas, alarma ta wordo bati pa un bringamento cu a tuma luga den KIA y a finalisa den un hincamento cu a tuma luga den e area di de- tencion hubenil di KIA, cu ta haci e asunto aki uno mas serio, pasobra ta pone bo mes con e hobennan por tin e recursonan pa compra e ayudo pa trece e cosnan aki den KIA.

Den e pelea un persona a wordo herida y a pidi presencia di ambulance y paramediconan a trata e preso na e sitio y despues a transport'e pa hospital. Den un razzia cu a tuma luga rapidamente despues, a confisca diferente tipo di arma blanco den e seccion hubenil di KIA. Esey no ta e unico casonan cu tin pueblo preocupa pero tambe e uzo di arma di candela. Ta parece cu ta masha facil pa compra arma aki na Aruba. Ni e maneho di OM, cu ta sigui e pensamiento di Hof den castigo pa casonan asina, no ta disuadi e hendenan di compra un arma. Castigonan di 18 luna bay ariba ta wordo imponi pa esnan cu wordo haya cu un arma di candela.

Dialuna tabatin un caso unda cu tabatin arma di candela y probable- mente tabatin di haber cu problema cu tin entre gangnan na Noord. Polis ta wordo manda na un cas na Monserat unda cu un persona a pasa los tiro riba e cas, probablemente den oranan di madrugada.

E patruya cu a yega na e sitio a topa cu marca di perforacion di bala na diferente area di e cas. Ta muestra manera cu un persona a pasa den auto y a los bala riba e cas.

No ta conoci ainda si esaki ta relaciona cu problema cu tabatin entre gruponan despues di Lighting Parade y cu tabatin asistencia pidi den Christiaanstraat. E personanan deteni a wordo laga liber algun ora despues.

Esaki ta muestra cu mester tin un control mas estricto riba e bar- conan cu ta yega di afo, cu ta e forma mas normal, of ora ilegalnan ta drenta, cu e armanan ta drenta Aruba.

Prome Minister Evelyn Wever-Croes:

Pasaheronan pega na Venezuela tuma conta cu aerolinea mas lihe posibel

FRONTERA entre Venezuela y Islanan ABC ta keda cera pa un tempo indefini. Esaki kiermeen cu buelonan no por sali of drenta pa y for di Venezuela. Gobierno di Aruba a logra si un excepcion cu a wordo duna pa busca e pasaheronan cu ta pega na Venezuela. Esaki ta loke cu Prome Minister Evelyn Wever-Croes a duna di conoce for di diadomingo.


Pa logra esaki, Gobierno di Aruba ta haci un yamada pa tur esnan cu ta pega na Venezuela pa acudi na e aerolinea pa asina yega na areglo pa wak con esaki lo wordo haci. Famianan di esnan cu ta pega na Venezuela, ta wordo pidi tambe pa tuma contacto cu nan famianan cu ta pega na Venezuela pa informa nan pa tuma contacto cu nan aerolinia.

Prome Minister a duna di conoce cu for di diadomingo e prome buelonan a cuminsa.

Y lo logra pa e siguiente dianan nos dilanti, pero segun e manda- tario no ta conoci te con hopi esaki lo logra. Un di e motibonan ta debi na e dificultad pa earolineanan haci buelonan bashi.

E contacto cu pasaheronan ta bayendo bon.

Algun aerolinea ta confrontando dificultad pa contacta nan pasaheronan pero tin riba plan pa bin diabierna cu tur su pasaheronan pega na Venezuela. Pa e motibo aki, Gobier- no di Aruba ta enfatisa pa tur pasahero tuma contact cu nan aerolinea mas pronto cu ta posibel pa asina nan haya sa ki dia e buelo di regreso pa Aruba ta.



Turistanan Venezolano cu ta pega na Aruba, Gobierno di Aruba ta haciendo lo posibel pa nan por regresa nan pais mas pronto posi- bel.

Ex Prome Minister Mike Eman a duna un 'gastcollege' na Universidad di Leiden

LEIDEN/ORANJESTAD- Ex Prome Minister Mike Eman siman pasa a duna un 'gastcollege' na Universidad di Leiden. Eman a wordo introduci dor di prof. dr. Jorrit Rijpma den number di e Instituto Europeo di Universidad di Leiden ilustrando e carera politico di Eman, particularmente su rol importante den realisacion di e derecho di voto pa Antiyano y Arubianonan pa Parlamento Europeo.

Eman a enfoca riba algun tema importante manera e paisnan ultramar, e structura moral y racional di Reino Hulandes, e principionan di igualdad y e derecho di voto pa Parlamento Europeo. Su lectura a wordo marca tambe pa loke t'e eleccionnan benidero di Parlamento Europeo na mei di e aña aki.

Presente n'e gastcollege tabata un cantidad grandi di estudiante y graduadonan den Ley Europeo, pero tambe conocirnan di Aruba, entre nan sra. Rosita Croes (viuda di Mito Croes, Minister y miembro di Raad van State), Laurens Jan Brinkhorst (ex-Minister y ex Catedratico den Derecho Europeo na Universidad di Leiden),

sra. Mildred Schwengle (miembro di Raad van State pa Aruba) y ex Wethouder Karsten Klein (candidato pa Parlamento Europeo di CDA) y ex Miembro di Raad van State pa Antiyas, sr. Wawoe).

Eman a cuminsa su college den forma significativa cu un expresion haci dor di Reina Wilhelmina na 1942 den relacion cu Reino unda varios pais hunto ta forma parti, mientras cada un di nan ta independiente pa actua y tuma nan propio decisionnan, 'steunend op eigenkracht, doch met den wil elkan- der bij te staan'.

Den luz di e acontecimentonan na Venezuela, Mike Eman a enfatisa cu un cooperacion den Reino awor mas cu nunca ta importante. Esey ta conta tambe p'e posicion strategico di Aruba, no solamente den siglonan cu ta tras di lomba, pero tambe awor.

Banda di esaki Aruba, segun Eman, kier keda involvi den un integracion mas aleu di Reino den Union Europeo.

'Nos ta mira den esaki un situacion win-win pa Hulanda y Aruba.



Pesey mi ta un defensor pa re-inicia e discusion riba e opcion pa Aruba ta un region utraperiferio di Union Europeo."

Dr. Vestert Borger, docente universitario di Derecho Europeo n'e Instituto Europeo di Universidad di Leiden, a gradici Mike Eman pa su tremendo college cu el a yama un contribucion special na mas y mihor comprension na Hulanda p'e posicion di Aruba, e historia di Status Aparte y e ambicion di Aruba pa ta mas involvi den Union Europeo. Vestert Borger a doctora na inicio di 2018 cum laude cu su tesis 'The Transformation of the Euro: Law, Contract, Solidarity'.

Mike Eman actualmente ta forma parti di varios instituto cu ta concentra nan mes den promove sostenibilidad y prosperidad comparti.

Den e calidad ey e tabata recientemente keynote speaker na Bermuda y Belize unda el a papia riba energia renobabel, SIDS y oportunidadnan nobo pa paisnan isleño pa nan ta ar-eanan di "research & development" den busca y haya solucionnan pa re-tonan global manera cambio di clima, maneho di oceano, desaroyo di energia alternativa y erosion di tera y tambe bou awa, modelonan socio-economico cu ta conduci na resultadonan husto pa e ciudadano.



Usando su propio palabra

Kico Minister Andin Bikker kier crea cu su Dinosaurionan den Security Advisory Board?



SIMAN pasa Minister di Husticia, Andin Bikker a percura pa un hilaridad, ora el a anuncia cu awor Aruba tin un Hunta di Consejo pa Seguridad y un Task Force pa yud'e combati y preveni criminalidad.

El a bin cu algun persona, cu por den tempo como Polis lo por tabata bon Polis, pero awe manera e propio Andin Bikker a crea e palabra, a bin cu un grupo di Dinosaurio. El a crea e grupo aki pa yude pa combati y preveni criminalidad. Hendenan cu merece di goza di nan pensioen. Ta bon e ta kere di por yud'e?

Pakico e no ta haci uso di tur Polis cu experiencia cu el a laga cu pensioen. Sin a haci uso di e oportunidad di nan conocimiento ainda, pero no el a percura pa un "brain-drain". Nos no kier cuminsa na menciona number, pero ta masha Polis cu masha experiencia Gobierno a laga nan bay, maske nan tabata dispuesto pa traha sigur un 5 aña mas.

Nan sigur lo por tabata mas efectivo cu e grupo di Dinosaurio aki. E grupo aki ta hayando pago?

Laga Andin Bikker mes analisa e Polisnan cu a baha recientemente cu pensioen, unda den nan tin p.e. esnan cu a traha den combatimento di trafico di droga, a sa di combati casonan grandi di labamento di placa, algun sa di atende caso di abuso di mucha y asina nos por sigui menciona un cantidad mas di experiencia cu nan tin.

Pero no, Andin Bikker kier nombra hendenan liga na partido di Gobierno, kendenan ta tur kima caba, pero a crea e posibilidad pa haci algo, y asina a bin cu e number na Ingles, Security Advisory Board & Task Force.

Si ta intencion di promove mas uso di Papiamento, pakico e number mester ta na Ingles? E ta musta mas interesante?

One of our clients is the Arugas Group, a well-established company that imports and distributes LPG for the Aruban market. On behalf of Arugas, we are searching for qualified and experienced candidates for the position of

TECHNICAL / ADMINISTRATIVE PLANNER

In this position you will oversee the operational department and manage employees. You will coordinate the execution of projects for a variety of industrial, commercial and household clients, while securing all permits and documents required for such projects. You will be responsible for an effective manpower planning as well as developing, planning and execution of HR programs such as personnel training, safety programs and regulations for field and office forces.

Arugas is known as employer with excellent pay and benefits.

WHAT WE ARE LOOKING FOR?

- Bachelor's Degree in Engineering or equivalent (relevant) field;
- Supervisory experience in dealing with Industrial Safety, preferably as related to oil and gas;
- Experience with project development including project bidding and contracting procedures;
- Experience with planning and effective utilization and control of available manpower and transportation equipment;
- Experience with a range of operational HR topics, including labor and union relations.



This vacancy is open for experienced professionals in the mentioned areas. If you recognize yourself in the position AND requirements, we would be eager to hear from you.

Please send application letter and resume to Johan H. Noordzij, via jan@advance-hrs.com.

Deadline for reactions is Friday, March 8, 2019

A psychological assessment may be part of the selection process.





BO MESTER DI WASTE BUCKET RESIDENCIAL OF COMERCIAL?

ecotech GROUP

YAMA

Mr. Bucket

594-3757

mrbucket@ecotech.aw

20 yrd Big Bucket

15 yrd Junior Bucket

10 yrd Small Bucket

Accidente cu un hende herida riba cruzada conoci di Dakota, ta caba cu pushamento y wanta



RIBA e cruzada Dadelstraat/Caya Papa Juan Pablo, ayera den careda di 10'or di mainta, a sosode un accidente riba e cruzada menciona, entre un Honda Acura y un scooter. E manehador di e scooter a keda herida. E auto maneha pa un cabayero tabata biniendo di pazuid den Dadelstraat pa cruza y sigui bay direccion nort den Dadelstraat. E scooter maneha pa un cabayero tabata riba e caminda di preferencia, esta Caya Papa Juan Pablo bayendo direccion pabou.

E chauffeur di e Honda Acura pa un of otro motibo no a duna e scooter preferencia y a sali su dilanti. E impacto tabata hopi fuerte cu e manehador di e scooter a keda herida benta riba caminda, su scooter a haya hopi daño material. Mesora despues di e accidente e chauffeur di e Honda Acura yen miedo a core bandona e sitio y el a manda su mama bay n'e sitio. E mes pa un of otro motibo no kier a presenta n'e sitio.

E mama kier a tuma over, pero e auto no tabatin seguro, aparentemente el a caduca basta tempo pasa. E mama di e chauffeur a cuminsa reclama cu un miembro di prensa tabata saca potret, e miembro di prensa a splik'e un cu'e otro, despues e mama a dicidi di co'i su telefon y cuminsa filma of saca potret di e amigonan di e herido, e amigonan cu no tin nada di haber den e accidente aki. Mesora a lanta cune y aparentemente un di nan lo a pase un wanta y asina cuminsa cu pushamento y zundramento.

Polis di Trafico n'e sitio, mesora a pidi refuerso, pero hopi liher e agente mes a logra calma e situacion.

E auto a keda confisca y transporta pa Warda di Polis pa mas investigacion. Polis a keda di bay busca e chauffeur di e auto p'e para responsabel pa su actonan.

E manehador di e scooter, kende tabata herida y tabata keha di hopi dolor na su pia y heup, a wordo transporta cu ambulance pa hospital pa un checkeo medico mas avansa.



Awo cu 2 florin mas, bo por gana e **MEGA PLUS**

* Afl. **520.000,-**

* Afl. 410.000,- + Afl. 110.000,-
extra




Minister di Husticia mr. Andin Bikker

KPA cu Mobile Comand Center y aumento di bon pa cuminda ta cumpli pa ser humano ta central

Minister di Husticia, mr. Andin Bikker dialuna mainta durante conferencia di prensa a uni su mes na palabranan di Prome Minister Evelyn Wever Croes pa felicita pueblo con e periodo di Carnaval a bay. Tambe e mandatario a felicita tanto Cuerpo Policial como CEA.

Cuerpo Policial Arubano, Brandweer, Ambulance tur otro departamento cu ta traha overtime pa por brinda e servicio y seguridad n'e pueblo y bishitantenan.

Den e cuadro ey tambe e mandatario a felicita Cuerpo Policial debi cu por a pone e Mobile Comand Center nobo di KPA pa duna asistencia durante paradanan di Carnaval.

Segun Minister Bikker esaki ta den cuadro di filosofia di Gabinete Wever Croes, ora ta papia di e ser humano central mester percursa pa su condicion laboral y ekiponan p'e por traha up to date.

Cu hopi orguyo por a activa e Mo-



bile Comand Center cu ta basicamente un post di Polis Mobile cu tin comunicacion cu un sistema di camara di diferente punto wireless. Cu e sistema aki por monitor e situacion y momento cu ripara cu algo ta pasando por dirigi e Polis p'e localidad y tambe e tin un efecto preventivo, pasobra publico sa cu nan ta ser vigila.

Los di esaki, tambe tin e aspecto di



<Continua na pagina 8>

Caso IBIS:

Paul Croes condena na 4 año pa 60.000 florin y 9 caha di cerbez

SI nos tuma e suma total di cargonan cu Huez a tuma pa condena Paul Croes den caso IBIS como berdad, e suma aki lo alcanza 60.000 florin.

Paul Croes mes ta keda para riba cu e no a ricibi placa ilegalmente pa permisonan di trabou. Pa tal motibo cu defensa di ex-Minister di Labor, Paul Croes a apela e sentencia.

Banda di algun otro punto e.o cu e lo a influencia un persona pa busca voto pa su persona, tambe a haci maluso di su poder como Minister y a malversa rond di 50.000 di su propio fundacion politico.

Ta keda e pregunta sigur, con bin cu pa un delito asina aki a duna Croes 4 año di prison?

Den e sentencia Huez a mostra cu e ta usa Paul Croes como ehempel pa otro politiconan y otro ambtenaarnan cu corrupcion ta algo serio. Paul Croes di su banda a mostra cu den 4 año di investigacion no por a haya ningun prueba concreto cu e lo a ricibi e sumanan aki, pasobra esaki simplemente no a sosode.

Locual Paul Croes a declara pafo di Corte ta cu su fundacion politico a aserca companianan pa suma nan menor pa eventonan politico y pa campaña.

El a bisa cu el a purba hacie na un forma transparente, pero cu e a bira e politico pa colga den e caso aki. Otro pregunta cu ta lanta. Pa pedofilnan, maltrato severo y delitonan moral castigonan ta hopi abou mes. Con bin pa e delito financiero aki a condena Paul Croes pa 4 año?

<Continua di pagina 7>

salubridad, pasobra cu mira un persona ta sinti su mes malo di salud mesora e por haya atencion y atendi cu urgencia.

Den cuadro di e esfuerso di Gabinete Wever Croes pa tene e ser humano central a dicidi di re-evalua e compensacion riba bon di cuminda cu ta haya momento cu personal di e ordedienst nan traha overtime.

Segun Minister Bikker, riba su proposicion, el a aserca Ministerraad cu e peticion y a bay di acuerdo pa hisa e balor di bon pa cuminda ora di traha overtime.

E bon di cuminda ta special pa tur ordedienst di pais Aruba cu ta Cuerpo Policial, Korrektie Instituut Aruba, Dienst Brandweer, Dienst Douane, Cuerpo Special Arubano, Migracion Aruba (IASA, GNC).

Momento cu Minister di Husticia mr. Andin Bikker a asumi responsabilidad como Minister el a ripara cu e bonnan pa cuminda no a ser ahusta desde 1993.

For di e tempo ey balor di e bon no tabata yega pa por cumpra un cuminda nutritivo.

E Gobierno anterior a priminti, pero den 8 año di gobernacion no a implementa net nada y pues nan no a

logra un solucion real riba e tema.


E decision di Consejo di Minister ta basa riba proposicion di Minister Bikker cu ta encera basicamente cu categoria A ta actualmente Afl. 7,50 lo bira pa Afl. 15,- y cu Categoria B. cu actualmente ta Afl. 12,50 lo bira Afl. 18,75.

Actualmente ta indexa esaki pa trece na un nivel realistico. Gobierno anterior nunca a implementa esaki den 8 año, pasobra for di 1993 no tabatin un indexacion di e bonnan pa cuminda y e decision positivo tuma den Consejo di Minister lo haya implementacion a corto plaso.

Esaki ta un adelanto enorme mirando e tempo cu a pasa alabes Minister Bikker a gradici tur colega Minister cu a coopera apesar di e situacion financiero cu tin su reto.

Minister Bikker, ta reconoce tambe e esfuerso di diferente sindicato, entre nan Sindicato di Polis (SPA) cu a pidi na varios ocasion pa hisa e suma di bon pa cuminda.

Chauffeur di Yaris no ta duna motociclista preferencia



DIALUNA den careda di 11'or di mainta, un biaha mas ta pidi pa presencia di Polis y ambulance cu urgencia pa un accidente n'e cruzada pariba di Morocho Dakota.

Na yegada Polis no ta bin topa cu niun auto, pero cu dos cabayero herida, y nan a splica Polis cu nan dos tabata riba un Hayabusa y un Toyota Yaris blanco glas getint no a duna nan preferencia. El a sali nan dilanti y pa evita cu nan lo a dal contra e Yaris, nan a medio desvia y a cay cu e bromer.

E chauffeur di e Toyota Yaris blanco a sigui core manera nada no a pasa. Dos ambulance a presenta n'e sitio y ambos cabayero levemente herida a wordo transporta pa hospital. Nan a splica Polis di e Yaris, pero no por a coi e number di auto mirando cu e plachi number tabata full blikia.

Avionnan no por bula bashi

Unda tur Arubiano cu tin pega na Venezuela ta?

Nan no kier bolbe Aruba, mirando e reaccion reci

GOBIERNO a logra pa Gobierno Venezolano habri e espacio aereo pa por trece e Arubianonan cu a keda pega na Venezuela, sin por bin Aruba y mescos tambe e Venezolanonan cu a bin pasa vakantie na Aruba y cu kier bay bek nan pais.

Ayera mainta, Prome Minister Evelyn Wever Croes a duna di conoce cu masha poco Arubiano a bin riba e prome buelo, pa cual e compania di aviacion (?) a laga sa cu nan no por bula bashi.

E interes di Arubianonan pega na Venezuela lo ta masha poco, of nan no sa di e espacio aereo a habri, di

manera nan por bolbe Aruba. Ayera Prome Minister Evelyn Wever Croes a laga sa, cu esnan cu no ta na altura, pa nan tuma contacto cu Embahador di Reino na Venezuela pa registra nan mes.

Y si ainda, no tin Arubiano cu kier haci uso e posibilidad di bolbe Aruba, anto no mester di ningun avion pa bula (bashi).

Dia cu a anuncia cu espacio aereo ta sera, e impresion a ser crea cu tin masha Arubiano na Venezuela, si por bolbe. Awe ta mira, cu esaki no t'e caso.

Registra awo!

Manda bo e-mail na noticia@awemainta.com

Ricibi AWEMainta tur dia den bo inbox



www.awemainta.com



www.facebook.com/awemainta



583-1400



583-1444

Di acuerdo cu e periodista Venezolano Vladimir Kislinger

Yiunan di e Chavista Diosdano Cabello a sali clandestinamente pa China



RIBA su cuenta di Twitter e periodista Venezolano Vladimir Kislinger, a duna di conoce cu yiunan di Diosdano Cabello, e di dos homber fuerte na Venezuela a biaha den fin di siman pa Beijing, China.

E yiunan di e dirigente Chavista, Diosdano Cabello

a bandona Venezuela den fin di siman, y nan ta Tito y Daniella Desiree Cabello Contreras.

Ambos a usa e di dos nomber y tambe fam di nan mama, pa no lanta sospecho di nan huymiento for di Venezuela. Asina e periodista Venezolano, Vladimir Kislinger a duna di conoce.

Inicialmente nan lo mester a biaha pa Cuba, of Russia, pero finalmente nan a dicidi di bay capital di China.

Pa duna credibilidad na loke cu Vladimir Kislinger a divulga y pa sostene su denuncia, el a publica e tarjetanan di embarque di e buelonan. Según por a lesa den e pasashinan, e yiunan di e actual Presidente di e Asamblea Nacional Constituyente di Venezuela a biaha den First Class.

Union Europeo ta descarta accion militar contra Presidente Venezolano



E posibilidad di core cu Presidente Nicolas Maduro for di Venezuela cu instrumentonan militar no ta un opcion pa Union Europeo. Esaki ta loke cu un bosero di Federica Magherini, alto representante pa e maneho extranhero y di defensa di Union Europeo a duna di conoce dialuna.

E hub humanitario anuncia anteriormente, cu Hulanda a instala na Corsou riba peticion di Merca, ta bay man den man cu un tratado entre Hulanda y Merca cu for di eyan lo no tuma luga ningun accion militar. E ta un simpel operacion civil. Di e forma aki ta trata di kita e preocupacion na Corsou pa un conflicto militar.

Conseho di Minister di e pais aki (Corsou) mientrastanto a bay di acuerdo cu e hub aki. A keda palabra cu Hulanda y Corsou lo keda mantene contacto estrecho riba e asunto aki. Corsou cu ta sinti su mes vulnerabel no kier ta parti di un conflicto cu Nicolas Maduro. Tambe nan ta bisa cu tin contacto intensivo cu Aruba y Boneiro.

Hulanda a reconoce Presidente di Asamblea nacional Juan Guaidó como e unico representante democratico di Venezuela, desde cu el a auto-proclama su mes Presidente interino dia 23 di januari ultimo. E mester haya e chens pa yama eleccionnan nobo. E eleccionnan di mei 2018 durante cual Maduro a prolonga su periodo cu seis aña mas, tabata segun Merca y UE yena di irregularidadnan.

Mientrastanto tur hende sa cu e situacion na Venezuela ta escalando. E fronteranan a wordo cera, e ayudonan no ta wordo permiti pa pasa pa Venezuela. E mas o menos 3.4 miyon Venezolanonan cu a huy di e pais, tin 3.6 miyon paden di Venezuela cu ta continuamente riba caya.

E situacion humanitario ta malisimo y ta wordo bisa cu entre 12 pa 20 miyon Venezolano ta sufri di hamber. Tin necesidad urgente di alimento, mescos cu awa y remedi. Principalmente pa e muchanan e situacion ta hopi serio.

Relaciona cu e acuerdo sera, Hulanda tin tres coordinador di ayudo na Corsou. E hub no a wordo yena ainda cu e mercancianan di ayudo. Nan lo mester yega e siman aki na Corsou. Ta trahando riba logistica, p'asina cu e produccionnan yega wordo manda di biaha pa Venezuela asina Maduro duna permiso pa esaki. Sin su permiso ningun accion por wordo tuma, apesar cu Hulanda no ta reconoce como Presidente.

Den fin di siman oposicion a trata di drenta cu e ayudo humanitario via di e frontera cu Colombia. El a conduci na enfrentamento cu e trupanen di Maduro. Trucknan cu alimento y remedi a wordo kima y e intentonan a fracasa. Europa ta trata via di un grupo di contacto internacional pa yega na un solucion politico. Guaidó dialuna a bay den consulta cu Colombia, e tin contacto cu vice presidente di Merca Mike Pence y cu representante di paisnan di Sur y Centro America. Contrario na loke cu UE ta p-ensa, Merca ta pensa cu un intervencion militar no ta wordo descarta.

Si dado momento Maduro habri e frontera pa ayudo, e ora Corsou, debi na su ubicacion geografico ta e puerto ideal via cual ta manda e ayudo humanitario. Den esaki Nacionnan Uni y Cruz Cora lo haya un rol grandi. Awor nan ta keda bou di radar, pasobra Maduro ta trata di haci trabou di e organisacionnan aki imposibel.

Melvin Tromp di AVP

Gobierno ta uzando fraccionnan di coalicion manera un **'grabbelton'**



UN biaha mas a keda demostra siman pasa, cu esun cu ta manda den Parlamento, ta gabinete Wever Croes, cu ta dicidi ki ora tin reunion, riba kico tin reunion y ta pone miembranan di e fraccionnan cu ta sostene gobierno, pasa pa muchanan manda cu pa colmo no tin nocion kico nan tin cu haci of no haci.

Melvin Tromp vocero di AVP ta mustra cu siman pasa gobierno a dicidi di bin Parlamento pa duna informacion relaciona cu e comision di supervision financiero caminda en realidad no a bin algo nobo dilanti y cu gobierno ta esun cu tin cu dicidi kico ta bay pasa cu e ley di CAFT nobo.

“E falta di seriedad di e gobierno di coalicion a bolbe refleha su mes un biaha mas ora cu practicamente no a duna Parlamento ningun informacion valido riba e ley nobo di CAFT y kico lo bay pasa dentro di algun siman ora cu e ley aki yega Parlamento.

E solo hecho cu secretario di estado Knops a declara cu pa dia 22 di april proximo e ley aki lo keda cla y aproba, ta mustra cu na Hulanda ya no tin mucho cos pa papia ariba, ya cu gabinete Wever Croes ya a bay di acuerdo con e ley aki tin cu bira ya cu tin un acuerdo firma caba cu gobierno di Reino.

E falta di seriedad a manifesta su mes ainda mas ora cu den oranan di atardi ni un quorum e tres fraccionnan por a logra pa e reunion y tur loke minister di finansa y minister presidente a bin duna na informacion, en realidad no ta duna ningun claridad riba e ley nobo aki con e comision di supervision lo sigui funciona ora cu e keda presenta na Parlamento.

Na final di e reunion fraccionnan cu ta sostene gobierno a dicidi di presenta un mocion den cual nan ta urgi gobierno pa manda informacion of un concepto di e ley aki pa Parlamento haya mas claridad kico esaki lo bay bira y con esaki ta hinca den otro.

Sinembargo ya caba gobierno di Reino tin acuerdo cu gabinete Wever Croes riba e particularidad aki y ta tristo cu ainda gobierno no a permiti ni su propio fraccionnan den parlamento, un bista di contenido di e protocol cu a wordo firma na 2018 cu ta permiti CAFT sigui cu su trabou di supervision pa cu presupuesto 2019.

En realidad e fraccionnan den Parlamento ya ta wordo poni 'buitenspel' ya cu tin un protocol caba firma pa prome minister Evelyne Wever Croes y pa minister di finansa Xiomara Ruiz Maduro caminda ya gobierno a acepta e condicionnan bou di cual nan lo sigui traha cu CFT y fraccionnan cu ta sostene gobierno por bula'riba bula'bou ya cu hasta gobierno a priminti gobierno di Reino cu pa dia 22 di april e protocol aki lo pasa pa bira e ley nobo bou di cual CFT lo haci su trabou proximo añanan di e gabinete aki.

Fraccionnan a presenta un amienda caminda den forma contundente a bolbe keda demostra cu nan no tin control riba nan gobierno, cu nan ta un stempel parlament di prome ordo y tin cu haci loke gobierno dicidi y den e caso aki ya gabinete Wever Croes a dicidi hunto cu Hulanda caba kico tin cu bay pasa of ta pasando caba. Fuera di a wordo converti den un grupo sin poder algun riba un gobierno cu nan tin cu controla, e tres fraccionnan aki ta parece un grabbelton cu ningun sa kico ta bay pasa cu nan, pero ta gobierno ta esun cu ta hinca man y dicidi kico nan tin cu haci,” Melvin Tromp di partido AVP a declara.

Di un organisacion boluntario pa uno profesional

Arubaanse Voetbal Bond transformando structura bieu pa nobo



DESPUES cu Arubaanse Voetbal Bond a entrega un plan pa reorganisa e federacion a base di su plan strategico na FIFA y esaki a keda aproba, AVB a cuminsa cu e ehecucion di e plan aki.

Asina aki tambe a invita Gregory Engelbrecht di Engelbrecht Global Consulting pa sinta cu Arubaanse Voetbal Bond (AVB) y Secretario General interino pa trata un di e pasonan importante di e plan strategico pa profesionalisa AVB. P'esaki mester crea un base p'e AVB nobo. E base ta parti di structura, manera e organogram y diferente funcion necesario.

Esaki ta importante pasobra den e plan strategico AVB ta delinea e pilar of e areanan cu e kier traha den dje, e direccion cu e kier bay, e obhetivonan cu e kier logra p'e siguiente 4 añanan nos dilanti, asina Gregory Engelbrecht, Fundador di Engelbrecht Global Consulting, a indica. E ultimo aki tin un experiencia amplio trahando na FIFA na Swisa y como tal por duna un bon na AVB.

Durante e "Kick Off Meeting" aki, Presidente, Secretario General di AVB y Engelbrecht Global Consulting a repasa e plan strategico y evalua kico tur AVB kier logra pa link esaki na e structura cu e federacion mester pa por hinca nan den otro y logra e metanan.

A defini tur locual ta haciendo den 3 fase, e prome ta defini e organogram y pa describi e funcionnan critico.

Den e organisacion mester algun funcion y e idea ta pa caba esaki na final di maart p'asina tin un structura cu por uza na april caba pa contrata ehecutivonan nobo of pa guia esnan cu tin actualmente.

E siguiente fase ta pa introduci e organogram y e funcionnan oficialmente y despues defini otro funcionnan cu falta ainda. Esaki ta un trayectoria un tiki mas largo, pero e trabounan lo cuminsa unabes cu introduci e funcionnan.

Lo haya un proceso pa cumpli cu e funcionnan, cumpli cu e rekisitonan di funcionnan y evaluacion di cada un persona cu ta traha den un di e funcionnan.

Despues cu AVB a lansa e plan strategico, awor ta ehecutando e proyectonan cu ta prescribi den e plan.

"Un di e pilarnan cu AVB ta traha riba dje ta pa profesionalisa e organisacion", asina ing. Richard Dijkhoff, Presidente di AVB, a expresa. AVB kier logra trece claridad den e organisacion, con esaki mester ta y e funcionnan cu tin den e organisacionnan. Tambe prescribi e rol y e responsabilidad di cada funcion.

Haciendo esaki lo trece un claridad, no solamente interno, pero specialmente externo, pa compronde con e federacion ta funciona desde awor en adelante. FIFA ta eherciendo hopi cambio pa profesionalisa e federacion. ing. Richard Dijkhoff ta convenci cu tur hende por compronde cu e federacion no ta un club di famia, club di amigo of djis ban haci algo, pero e federacion por ser considera como un organizacion profesional, un compania.

E idea ta pa purba hinca e structura bieu di e federacion den un structura nobo. Reynaldo Geerman, Secretario General interino, a expresa cu e structura nobo aki ta rekeri varios cambio pa mihor, pa un AVB hopi mas profesional, eficiente, cu un vision transparente y cu metanan di duracion corto, mediano y di tempo largo.

E diferencia ta cu den e structura nobo e federacion ta traha transparente y tur partner ta na altura di e vision y di e metanan cu mester logra.

Aruba Marriott tin un General Manager nobo

Karen Chastain a wordo nombra General Manager di e compleho di Aruba Marriott. Den su funcion nobo, Chastain ta responsabel pa maneho strategicamente di Aruba Marriott Resort & Stellaris Casino, Marriott's Aruba Surf Club y Marriott's Aruba Ocean Club.


Karen Chastain ta brinda mas di dos decada di experiencia den liderazgo p'e marca di Marriott Hotels y a fungi como General Manager na varios hotel di Marriott na Merca, y mas recientemente na Fort Lauderdale Marriott Harbor Beach Resort & Spa na Florida.

"Mi tabata hopi afortuna di por a traha na tur dos costa di Merca cu Marriott y mi ta sumamente contento di por bay experiencia tur locual e isla vibrante di Aruba y e compleho di Marriott tin pa ofrece", Karen Chastain a comparti.

"Alabes di tuma e oportunidad pa dirigi un di Marriott su propiedad di mas prominente den Caribe, mi ta entusiasma pa por explora e cultura local y asina fortalece relacion nan duradero y mutuamente benefical cu e comunidad."

Karen Chastain tin un amplio conocimiento den liderazgo financiero y un pasado exitoso den benta, maneho y e funcionamiento di hotel. E ta pasiona cu desaroyo di e personal y ta hopi enfoca riba asegura satisfaccion di huesped. Chastain ta un graduado di Ball State University cu un 'Bachelor of Science Degree' den accounting.





Xpresa bo mes

Mas kamer di hotel in Aruba? Amigo o Enemigo?

Pa: Jan van Nes
Director ATA 1995-2000

CU e noticia recién cu un desaroyo na San Nicolas di 900 kamer mi a reflexiona kico esey lo encera pa San Nicolas y Aruba en general.

Den e contexto aki mester tuma na cuenta cu tin otro 3000 kamer den pipeline pa Aruba cua segun mi tin entendi, no por wordo cancela. E ponencianan cu ta sigi no tin cu haber si San Nicolas merece un desaroyo pa lanta su economia drumi (dor di e.o. e ceramento di e refineria), pero kico e desaroyo aki ta nifica pa nos isla su calidad di bida?

Den e luz ey mester bisa cu 900 kamer pa Aruba. NA UNDA CU TA, no ta un bon idea. Pakico?

Nos a tende varios motibo caba: Raport di CBA ta papia cla di loke t'e saturacion di e producto Aruba, nos "density" per vierkante kilometer, nos infra-structura cu no por maneha e cantidad di trahador stranhero cu mester wordu importa, klasnan super grandi of falta di klas y scol, e placa cu lo bay afo y e poco cantidad di spin off cu lo genera etc.

Pone tur esaki den balans den mi modesto opinion no ta hustifica un destruccion di naturaleza asina massal di un di e areanan mas popular pa nos hendenan local y turistanan.

Otro puntonan:

E formula pa midi un inversion cu un "rule of thumb" (ezels bruggetje) ta facil: Tuma e inversion y divide dor di e kambenan planea y multiplique cu 1/1000! A base di esaki, un inversion di \$90,000,000 dividi dor di 900 kamer lo duna un inversion pa kamer di \$100,000 y un average room rate di di \$100 pa kamer? Esaki ta "high end all inclusive"?

Cu e vision aki mi ta duda cu hopi restaurant lo establece na SN. Kico t'e prisa, mientras nos por spera otro desaroyonan chikito di "boutique" hotel?

Economista Arjen Alberts a dedica un estudio extensivo n'e desaroyo di turismo na St. Maarten y Aruba tres aña

pasa cu e pregunta con bon nos a prospera di turismo. Su conclusion: "The fact that each year more tourists are coming to Aruba does not signify that the prosperity is on the rise". To the contrary, the average prosperity has been the same during the last 25 years.

Su conclusion ta cu Aruba NO a prospera den turismo e ultimo 25 añanan. Ora nos GDP a crece igual a crece nos población y ta mas tanto inmigrantenan a yena e posicionnan crea dor di expansion hotelero.

E bolo ta bira mas grandi, pero tambe e bolo ta wordo parti den hopi mas pida. Segun Alberts: "It is even possible that our prosperity may even be reduced in future or stays the same. The bottle neck is the lack of space. The island is filling up. We ran hard but did not advance!".

E unico solucion segun e economista ta pa enfoca riba e experiencia di nos turista. "Less tourists who spend more". Esaki segun ami ta Papiamento cu nos tur por compronde!

Prome cu drs. Arjen Alberts, profesor Sam Coke y Victoria Razak a haci un estudio extenso di nos turismo como 15 aña pasa. E "Framework for Sustainable Tourism" presenta na 2003/04 ta boga pa un desaroyo sostenible chikito distribuí riba tur nos districtonan.

Su recomendacion despues di a consulta cu casi tur gremio y profesionalnan no a haya un oido serca ningun Gobierno cu a prefera luci cu desaroyo grandi. Ki lastima!

E ultimo añanan, consciente o inconsciente nos pueblo si a aplica e recomendacion di Cole/Razak. Esey dor di un desaroyo di "vacation homes" variando di 1 pa 20 apartamento den cada skina y bario na Aruba incluyendo San Nicolas.

E impacto di e "vacation homes" di cual hopi no ta nada barata ta encera trabou pa companianan di pool, limpieza, mantenimiento, y utilities naturalmente. Logicamente e peso riba e mercado laboral local ta minimo.

Sigui na pagina 15>

Gobierno tabata hopi slow di set up pa crea un sistema di “room tax” y ehempelnan nan simpel ta existi di lugarnan cu ta biba di “vacation homes” (Breckenridge Colorado) unda tur “vacation homes” ta registra y ta paga nan “fair share” na room tax.

E segmento di “vacation homes” ja ta encera casi 25% (33% varios aña pasa) di bishitantenan kedando na loke ta yama “other accommodations” y ta un indicacion cla di un preferencia distinto di nos bishitantenan. Cuanto di nan lo keda na un “mega all inclusive”? Lo ta bon pa Aruba consolida su producto y hacie mihor. Drecha loke nos tin y segura cu nos ta duna servicio optimo.

Manera Alberts, Cole y Razak a sugeri: MENOS TURISTA CU TA GASTA MAS. Estudionan di ATA ta muestra bon cla cu nos calidad versus balor a bay atras. Laga nos percura pa drecha tur esaki prome cu nos bin cu (hopi) mas kamer.

Den e luz aki 90 kamer pa aña no ta un mal punto di salida pero 900? Mas Embassy Suites cu 330 kamer, St. Regis cu 250 kamer y mas condos!! Otro aspecto pa consideracion of preguntanan cu nos mester haci y contesta: Nos graduadonan ta bay yena e cuponan di trabou cu lo parece ora e “roomkeepers” y otro personal di servicio local lo baha cu pensioen pronto?

Nos graduadonan ta interesa den funcionnan manera dishwasher, busboy o waiter, cu t’e cuponan di trabou cu mas lo mester wordo yena ora un hotel di 900 kamer mas otro 700 kamer habri nan portanan?

Mayoria di nos horeca ta sufri falta di personal cu no por yena e actual cuponan di trabou cu tin. Mayoria di hoben o graduadonan ya no kier traha anochi, weekends of dianan feria. Con nos ta pensa yena tur e cuponan di trabou di un mercado local si claramente tin menos interes den horeca?

Ki educacion nos ta bay ofrece cu lo causa cu nos hoben nan di repente si lo drenta e mercado di horeca TANT-EN e acento di e trabounan aki ta cay riba trahamento di anochi, weekend, shift y dianan feria? Lo ta bon pa menciona cu hopi di e cuponan di trabou cu tin no ta consisti di cheap labor pero ta paga bon! Cuanto cupo di trabou lo genera pa San Nicolas y pa Aruba?

Cuanto joyeria y boutique lo establece na San Nicolas y kico lo t’e spin-off di un “all inclusive”?

Mi no ta corda cu a discuti e proyecto aki cu gremionan y mi ta duda cu e preguntanan a wordo contesta debidamente.

Ta un momento cu mi ta admira e sistema di referendum cu Suissa tin 4 biaha pa aña.

E proyecto aki, igual cu e otro proyectonan pabou di brug, a wordo planea sin mucho input di NGO’s Board pa pueblo acepta no mas. San Nicolas lo gana mas cu desaroyo chikito y intimo manera un Paradera Park, Un Boardwalk Hotel, un Bucuti, un Manchebo, un Amsterdam Manor y un Ocean Z pa duna number y fam.

Un par di desaroyo chikito manera na Savaneta (no barata porcierto) unda bishitantenan tin contacto cu e doñonan y personanan y unda tin un “repeat facto”r masha halto mes. San Nicolas por carga 90 kamer cada aña cu lo acumula den 900 kamer den 10 of 15 aña aña, pero un desaroyo di 900 kamer den un solo proyecto lo ta totalmente fo’i su lugar pa ni papia di e daño ambiental cu lo causa no solamente na San Nicolas, pero na cualkier otro districto di Aruba.

Y den tur e locura pa forsa un desaroyo cu tin potencial di haci un impacto devastador riba nos calidad di bida lo ta bon pa puntra nos bishitantenan actual “Is this the road we should take?”

Tin bishitante mal contento cu a desaroyo aki cu lo scoge otro destino turistico?

E siman aki mi a combersa cu Samia, un turista cu ta bin Aruba pa 30 aña y cu a cambia Palm Beach pa Savaneta: su pregunta tabata: “Whats wrong with these people”!

Lo ta bon pa menciona cu Samia ta un fiel bishitante di Baby y Rodgers Beach y restaurantnan na SN. E impacto di un “large development”t ta impactante pa Aruba y mi ta sinti ta wordo bagatelisa, mientras cu e desaroyo di e ultimo 15 añanan ta wordo sinti tur dia.

Den trafico, den klasnan di scol, den nos calidad di bida diario cu ya no ta mescos cu e calidad di bida cu nos tatanan tabatin, y nos a experiencia ora nos a lanta na Aruba. Nos nietonan lo puntra:” Opa, conta nos di conchi y nos lo bisa, “ bueno e ta parti di un desaroyo turístico ayo” y nan lo puntra “conta nos di Baby Beach y Rodgers Beach” y nos lo contesta “once upon a time”..... Y nan lo puntra: “Pero kico bosonan a haci pa para e desaroyonan aki”? Y kico nos ta bai contesta? Cu nos a pone nos confianza den algun politico, interes ajeno, cu nos a keda keto, pero cu si nos a pone un mensahe riba Facebook!!!

Mi ta invita mi ex-coleganan Directornan di Turismo di antes (Michael Kuiperi, Rory Arends, Remigio Wever, Mirto Granadillo, Charlie Ybarra, y Myrna Jansen) pa vocifera nan opinion..... pasobra na final di dia, mi por ta robes.

Rafael Barragán orguyoso di por sensibiliza otro sernan humano pa medio di imagennan

Foto-Documentalista di Switch Foundation a destaca cu su potret den **"Faces & Nature"**



DURANTE Aruba Art Fair 2018, un di e actividadnan cu nan a ofrece na e comunidad tabata un concurso di fotografia: "Faces & Nature".

Esaki tabata e di dos edicion y durante esaki, Rafael Barragán, Fotografo y Documentalista Social, a dicidi di participa cu un retrato cu el a haci di un señora di San Nicolas cu yama Dina Vorts. Barragán, kende a traha como foto-documentalista di e reconocido fundacion cu enfoca social "Switch Foundation", a indica cu e concurso tabata habri pa publico y mas di 150 potret a participa y a wordo evalua. Na final a scoge 10 potret: 5 potret pa "Faces" y 5 potret pa "Nature".

E potretnan aki a wordo exponi na e galeria Artisa, ubica na San Nicolas den e luna di December durante e "San Nicolas Experience". Esnan cu a bishita e galeria a haya oportunidad di vota pa e potret di nan preferencia. Ningun potret tabata tin e nomber di e autor. Nan a wordo identifica cu un number y e publico simplemente tabata vota segun e number ariba e potret.

E potret di Rafael ta esun cu a haya mas voto pa loke tabata e categoria di "Faces". "Esaki ta yena mi di alegria pasobra no tabata tin un hurado meymey, sino cu tabata e persona mes, e comunidad, kende a eligi mi potret como e imagen cu mas a impacta nan y cu mas a mostra e identidad di e Arubianonan", e comunicador social a expresa.

Segun Rafael Barragán, esaki p'e ta un echo importante. "Ami cu ta un inmigrante na Aruba, por tin e privilegio di acerca na e comunidad Arubiano y di por sensibiliza otro personanan cu e imagen aki ta yena mi di orguyo".

El a agrega cu e organizador di e evento, Tito Bolivar, a laga sa cu e expo aki di "Faces & Nature" lo sali di Aruba y cu lo wordo exponi na Hulanda, Miami y Colombia.

"Esaki ta yena mi di emocion tambe pa dos motibo clave. E echo cu Aruba ta mustrand e identidad di su isla pa medio di e imagenan capta door di esnan cu ta participa den e concursanan aki, buscando e sensibilidat diario di e Arubiano. E di dos motibo ta como inmigrante Venezolano mi por representa Aruba na otro pais, ya cu mi ta sinti parti di e comunidad y cu e comunidad ta aprecia mi trabao", a manifesta.

TRABAO NA SWITCH FOUNDATION

Rafael Barragán a yega Aruba varios aña pasa pa traha como parti di e team di produccion di Switch Foundation. For di cuminzamento, su fundadora, Paula Nahr a wordo impacta pa e trabao di Rafael. "El a wak parti di mi "portfolio" ariba internet y el a wak den mi fotografianan e sensibilidat social cu tabata tin mester den e fundacion y cu ta permiti logra un interaccion cu otro persona pa medio di e imagen".

Barragán ta un apasionado di e fotografia, pa medio di cual por transmiti emocionnan.

Un potret por transmiti miles di storianan, cu un simpel bista, pa medio di e paña di e persona of atravez di nan entorno. Esey ta e magia di e fotografia y loke e documentalismo y periodismo a pone mi busca, el a manifesta. "Mi ta gradici Switch Foundation y e organizadornan di 'Aruba Art Fair' pa permiti mi mostra mi imagennan, pa permiti mi forma parti di e comunidad".

Desde cu Rafael a yega Aruba el a traha incansabelmente cu Switch Foundation haciendo entrevistanan y bishitando fundacionnan. "Esey a yuda mi siña Papiamento casi di bi-aha, at least pa un par di minuut", a expresa. "Como periodista, despues di a traha den diferente medio, e fotografia a yega na mi persona formalmente y poco poco tur cos a alinearse pareu. Periodismo cu Fotografia y asina mi a bira un reportero grafico of un "photo journalist".

Esey ta precis loke Paula Nahr di Switch Foundation a wak den mi trabao, a bisa. E poder di acercamento y e poder di humanidad y di logra cu otronan por identifica nan mes cu e imagen.

Mester remarca cu Rafael Barragán a participa den e produccion di varios documentario hunto cu Switch Foundation cu a causa hopi impacto na Aruba. E ultimo ta un proyecto cu ta hayando hopi acogida na nivel regional y internacional y esaki ta 'Promesa Falso' cual ta enfoca riba e tema di trafico humano.

"Definitivamente esaki ta di e proyectonan mas importante cu mi a asumi den mi bida. Conta cu e colaboracion di e team di Switch Foundation tabata algo hermoso ya cu ta trata di un tema hopi sensibil y bastante delicado". "Promesa Falso" a resulta di ta un documentario cu un trabao fotografico exisito y esaki ta danki na e excelente trabao di Paula Nahr, su tremendo team, y cu Rafael Barragán como foto-documentalista.

Por aprecia e documentario aki pa medio di Youtube: Switch Foundation.

Dos persona herida den accidente di trafico na Koyari



DIADOMINGO anochi Polis a bay poco pura na altura di Italo Arubano, situa na Koyari. Aki un accidente di trafico a sosode y lo tin heridos.

Na yegada Polis ta topa cu dos auto hopi kibra. Tabata trata di un Chevrolet Aveo y un Hyundai Elantra. Den ambos auto tabatin hende herida.

Loke Polis pora conclui di su investigacion ta cu a Chevrolet a subi e cruzada y no a duna preferencia n'e Hyundai, cu tabata biniendo di zuid. Esaki a causa un impacto basta fuerte, lagando dos persona herida un den cada auto. Dos ambulance a presenta n'e sitio pa atende cu esnan herida.

Control di Unidad Motorisa durante Parada di Mucha di San Nicolas

Di 400 auto para, a detene 7 chofer, kendenan tabata bao di influencia





CONTROLNAN di Unidad Motorisa a sigui durante y despues di Parada di Mucha di San Nicolas riba primeramente pa coremento bou influencia di alcohol.

Unidad Motorisa a para diferente caminda di salida for di Parada di Mucha San Nicolas e.o. n'e retonde di Pos Chiquito..

A para mas o menos 400 auto y pone e chofernan supla dor di e alcosensor como e investigacion temporario. Un total di 7 chofer a wordo deteni pa core bou influencia di alcohol despues di e Parada di Mucha di San Nicolas.

Alabes mayoria di e chofernan di e trucknan den e parada a wordo getest. Tur e chofernan di e trucknan cu Unidad Motorisa a para y test a supla 0 ug/l. Unidad Motorisa tambe a duna total di 30 multa pa diferente infraccion.

Cuerpo Policial ta informa cu e controlanan lo sigui pa loke ta trata e ultimo siman di actividad di Carnaval.

Percura pa bo tin bo papelnan na ordo y si bo ta bebe no stuur y si bo ta stuur no bebe.



Aña pasa tabatin 20 detencion
**E aña aki solamente
1 detencion tabatin
den parade di mucha
na San Nicolas**

DIADOMINGO merdia pa 1:02 SMAC conhuntamente cu Cuerpo Policial a duna inicio n'e parada di mucha na San Nicolas. Tabata tin 6 grupo y mas o menos 1200 participante. Polis mes a conta cu 200 personal riba pia.

Diferente departamento di Cuerpo Policial a traha hunto e.o. Polis Uniforma, ME, Motor Unit, K-9, Departamento di Recherche, Personal Administrativo y nan Comando Kamer. Tambe a haya asistencia di personal di CEA.

P'atardi 4:44 .cabez a yega y pa 5:51 e parada a yega su final. Pa 7:44 anochi a kima Momito den Carnaval Village. Segun Polis, e aña aki nos a conta cu 1 detencion. Aña 2018 tabata tin 20 detencion.

Cuerpo Policial ta satisfecho y contento cu e comportacion di e publico.

Parlamantario Sue-Ann Ras (MEP):

“Social Crisis Plan ta drenta den su prome fase di control manera ta stipula den ley”

FOR di momento cu Gobierno Wever Croes a tuma rienda di e pais aki, tabata sa di e retonan critico cu lo tin, ya cu e señalnan y hechonan tabata presente, pero e Gobierno anterior tabata sa di manipula y sconde tur e raportnan.

Na november 2017 Social Crisis Plan a lanta, ora cu Aruba a keda sacudi pa un tragedia di dos inocente, cu ta representa y refleha e cantidad grandi di caso di abuso di mucha y violencia domestico na Aruba.

CONTROL DI FONDO Y PLAN

Social Crisis Plan ta den pleno ehecucion, despues di a confronta un sinfin di reto, según Parlamentario di MEP, Sue Ann Ras. Na caminda a sa di bin cu diferente solucion pa confronta e retonan y mas cu claro esakinan a conduci tambe pa retrasa henter e maneho.

Un di e retonan principal tabata esun di fondo, unda cu mester a lanta un ‘begrotingsfonds’ di Social Crisis Plan, cu a haya aprobacion di Parlamento completo, p’asina por realisa y ehecuta Social Crisis Plan.

“Mi kier enfatisa y aclarea cu e control di loke ta trata fondo y maneho completo di e Social Crisis Plan ta sosode den diferente fase. No mester descarta niun momento so, cu e retonan social ta enorme y mas cu claro un problema acumula conscientemente pa 8 año y mas, lo haya solucion den un solo biaha. Tur cos mester cana structura y na un manera mas eficiente y efectivo posibel, unda cu cada instancia y persona en cuestion ta hunga un rol di sumo importancia na bienestar di e realisacion y ehecucion optimal di Social Crisis Plan” Sue Ann Ras a duna di conoce.

Durante diferente reunion mensual den 2017 y 2018 a logra yega na creacion di e plan di maneho y programa di exigencia di cada instancia, di cual tur ta relaciona cu e metanan principal di Social Crisis Plan.

Cu e dos exigencianan ey, e instancianan ta haya subsidio di e proyecto, hunto cu un ‘ministeriele beschikking’. Esaki t’e prome control, ya cu via e sistema aki, e instancia mester indica exactamente kico e kier logra y con e kier logra realisa su proyecto, pa loke ta trata e Social Crisis Plan.

SIMAN DI REUNION DI PROME RAPORTAHE

E siman aki durante 3 dia intensivo, cada instancia relaciona cu Social Crisis Plan, lo bin pa duna un raportahe di nan status n’e team encarga cu Social Crisis Plan, unda cu Sue Ann Ras tambe ta forma parti como Presidente di e comision di supervision di Social Crisis Plan. Según Sue Ann Ras na fin di januari nan a entrega e documentonan exige, manera ta stipula den e plan di maneho y asina ta bay controla si nan ta cumpli cu e criterianan, pa wak si loke e instancia presenta, ta cuadra cu e metanan di Social Crisis Plan.

“No mester lubida cu Parlamento a bin cu un amienda, unda a hinca un mecanismo di control riguroso y structural den e ley di ‘begrotingsfonds’, cu cada 3 luna esnan encarga mester bin Parlamento pa responsabilisa nan mes tambe” Sue Ann Ras a finalisa bisando.

Pues manera cu tur e reunionnan aki ta tras di lomba, Sue Ann Ras lo pidi un reunion publico tambe pa henter pueblo di Aruba ta na altura di e avancen y status di Social Crisis Plan, brindando asina transparencia y un maneho vigila di e fondonan publico.



Payroll Pro HRM y SV Unistars tambe ta celebra Carnaval 65

DIASABRA, 23 februari, Payroll Pro HRM y SV Unistars a bin hunto na e kavel di Payroll Pro HRM pa un rato ameno.

Payroll Pro HRM ta e main sponsor di SV Unistars, cu ta un team di futbol hungando den division uno y cu ta contando cu 8 victoria consecutivo.

Payroll Pro HRM ta sigui desea SV Unistars un resto di temporada hopi exitoso!



Disfruta di ultimo paradanan di Carnaval 65 sano y salvo

CARNAVAL 65 ta drenta su ultimo siman den un gran forma. Nagico Insurances Aruba ta desea e publico completo y alabes tur carnavalista un bon culminacion di temporada di Carnaval na un manera sano y salvo. Mirando e dia nan druk na caminda, Nagico kier recorda pa tur persona bay poco-poco ariba caminda pa asina por yega na e destinacion sin ningun problema.

Kier a recorda ariba Nagico su Road Service cu ta cla pa yuda tur persona cu mester di asistencia of ayudo banda di caminda. E servicio aki ta disponibel 24/7, na tur momento di dia, anochi y marduga na tur cliente y tambe na persona nan cu ainda no ta ta cliente. Simplemente yama 191



pa asina Road por asisti durante di e.o.; Accidente, Flat Tire, Jumpstart, Lock yabi den auto, Auto no kier

start, Towing, etc.

Nagico ta desea e pueblo di Aruba un dushi temporada di Carnaval.

BON DIA YEN DI ALEGRIA

Skirbi pa Ruthy "Lady Ruth" Vrieswijk-Bergen

NOS Aruba, como un isla multicultural, un perla den lama. Nos por ta chikito den tamaño pero grandi di curason. Cosnan por pasa riba nos pida baranca of pafo di dje, pero nos di Aruba ta stima nos hogar y nos cas Aruba. Ta nos pais, ta nos isla na unda nos a nace. Hopi ta esnan di fe grandi cu ta sigui resa y pidi proteccion pa nos isla, y tambe pa nos lenga materno Papiamentu no bay perdi. Mientras den paisnan rond di nos tin situacionnan doloroso, nos ta habri nos dia cu un danki grandi na nos curason pa un otro dia di salud y di bida y hopi ta resa pa e bienestar di nos bisiñanan di pazuid.

Nos tambe tin duele di locual ta pasando y hopi ta esnan di fe aki na Aruba tambe cu ta resa tambe pa esnan cu a converti nan mes den enemigonan di nan mesun pueblo ayanan. Nos madre patria Hulanda ta sigui tira un bista riba nos y Dios mediante tur cos ta sigui bon cu nos akibandanan. Nos isla turistico, nos isla cu tin cu importa mayoria cos cu ta haci cu e prijsnan akibandanan ta caro. Como sernan humano cu sentimiento y amor, nos ta sinti pa nos prohimo cu sa pasa den situacionnan fastioso y of doloroso. Pero nos no tin control di tur cos tur ora. Nos ta confia cu Dios si tin e control riba su Universo crea cu asina hopi amor. Nos no ta comprende pakico y dicon tin otroan cu ta kere nan mes miho cu tur otro, y cu ta sigui trapa riba esnan humilde di bon voluntad pa traha y gana nan pida pan pa nan famianan. Mientrastanto e fiestanan di Carnaval ta continua cu su actividadnan colorido y musical ariba nos isla tambe. Nos a gosa di un presentacion di Carnaval na Trinidad & Tobago recientemente na television.

Mientrastanto cu hopi akinan ta den alegria, y ta contento, otroan den cercania ta tristo y preocupa. Nos ta comparti tempo cu otro den nos combersacionnan y recientemente nos a bolbe bishita Flor di Oriente, un lugá cu dushi musica pa alegre e curasonnan un crenchi, pasobra bo no por keda sinti e preocupacion y e stress pa otroan, bo tin cu cuida bo mes tambe. Tawata Diahuebs anochi cu Amado Rosina cu Oldies Night cu e canticanan di mas bunita di añanan atras. Nos a disfruta un mundo di cancionnan di The Beatles, y tambe di Tom Jones y Barry White.

Nos a hasta los e pianan y e heupnan un crenchi cu bishitantenan di Hulanda, tur gosando di e dushi anochi aki na Flor di Oriente, cu mas y mas ta sigui impacta, mescos cu e Diabierna anochinan na Djiespies Place, na unda musiconan local ta sigui brinda un dushi ambiente pa relaha y baila un crenchi. Pues, Flor di Oriente tin un dushi banda musical riba Diabierna anochi cu mas oportunidad pa gosa y diberti, baila un crenchi. Anto, Diahuebs anochi ta Oldies Night. Super pero super leuk! Pone bo bay bek cu flash backs di tempo di bo hubentud. Nan tin un menu chikito y simpel, pero hopi dushi mes y nos ta gusta nan batata cu saus di pinda cu nos glas di biña merlot. Y si e anochi ta canando mas dushi ainda, Lady Ruth tambe ta canta su Jambalayah of un otro cantica di su curason. Fei tempo di su añanan na Beach Club y Casa del Mar, Ruthy tawata canta de bes en cuando cu Amado Rosina pa nos turistanan. Nos ta sigui gosa di bida asina tambe cu nos dushi alegria! Musica ta e lenga di amor universal, y aki na Aruba nos tin hopi musiconan talen-



toso y special. Y nos ta bisa ayo y te despues na e gran musico saxofonista Lucio Rivadeneira cu palabranan di consuelo y hopi amor pa su Sra. Victoria, nan yiunan y nan nietanan. Danki Don Lucio Rivadeneira pa tur locual bo a duna y comparti di bo bunita inspiracion cu Aruba - Awor mas cerca di cada curason! Sigui luci y briya meymey di angelnan wardado yen di amor. Shonnan, danki pa e atencion y te otro siman Dios mediante. Ban sigui haci nos best pa ta un miho hende cada dia di nobo. Dios ta amor.

Aruba Bank a comparti ambiente carnavalesco cu comunidad di Aruba



E fin di siman tabata yena cu actividad di Carnaval. Aruba Bank, siendo un partner di SMAC, a participa den forma activo durante e diferente actividadnan.

Un publico grandi a disfruta di e Parada di Luz na Oranjestad y di e Parada di Mucha na San Nicolas. Aruba Bank su representantenan den trahe colorido, cu pluma y yen di briyo tabata parti regalo masha gusta pa esunnan na banda.

Aruba Bank ta orguyoso di duna bek na comunidad y yuda engrandece nos dushi Carnaval. Nos ta den e ultimo dianan di Carnaval 65, Feel the Vibe, y pa esaki ban sigui disfruta di dje sanamente.



Potretnan di Parada di Mucha San Nicolas





Resultado final di Torneo di ahedres Independencia Republica Dominicana

ARUBA Chess Federation hunto cu Caquetio Chess Club a organisa riba diadomingo dia 24 di Februari e prome edicion di un torneo di ahedres Independencia Rep. Dom. estilo Blitz.

E torneo aki ta wordo patrocina door di Consulado di Republica Dominicana.

Formato di e torneo ta cu e ta wordo hunga riba un dia. Cada hungado ta haya 5 minuut + un incremento di 5 seconde despues di cada zet pa termina nan partido. Un total di 9 rond ta wordo hunga den categoria U-18 y 11 rond den categoria U-12 y Open.

Un total di 40 hungado a participa na e torneo aki. 11 den categoria U-12, 17 den categoria U-18 y 12 den categoria Open.

Tur e weganan a wordo hunga den sala UNOCA di Cas di Cultura.

Den U-12 Girls a termina na prome lugá Mary Jane Bueno, segundo lugá Mia Mc Collum y tercer lugá Angelina Arens.

Den U-12 Boy a termina na prome lugá Patrick de Roo, segundo lugá Santiago Rodriguez y tercer lugá Kian Ng.

Best U-10 a keda pa Jeayonsley v/d Linde y bet U-18 a bay pa Lui Montoya.

Den U-18, a termina na promer lugar Tristan Cousineau. Tristan a score 7 punto for di 9 rond. Segundo lugá a bay pa Kellen van Deutekom y tercer lugá pa Thamara Sagastegui.

Best U-16 a bay pa Jean Pierre Acevedo y Best U-14 a bay pa Lesley Cielo.

Best performance, e hungado cu a progresa mas compara cu su startrating a bay pa Samantha Aponte.

Den categoria Open, e prome lugá a bay pa Peter v/d Brink. Peter a score 10 ½ punto for di 11 wega. Segundo lugá a bay pa Eldrick Donata. Eldrick a score 9 punto. Tercer lugá a bay pa Wilson Borbon cu 8 punto y di cuatro lugá pa Octavio Croes cu 7 punto.



Curacáo Airport Holding ta konstrui edificio nobo

WILLEMSTAD. Dia 21 di febrüari, 2019 Curaçao Airport Holding (CAH) a revelá su plan inisio di konstrukshon di e edificio nobo di nan ofisina.

E edificio aki tin un ròl hopi importante den e tarea di Airport Area Development i ta diseñá pa bira un edificio di ofisina multifunshonal. Su diseño ta unu moderno ku lo bira e sentro empresarial pa mundu di aviashon ku espasionan pa traha fleksibel.

Di e forma aki empresario i negoshantenan por usa e facilidatnan pa nan reunion i traha.

E promé piso lo ta ekipá ku un kantina i ta na disposishon di e miembronan di e komunidad di aviashon. E piso aki lo tin tambe un business lounge i diferente espasio di reunion.

E di dos piso ta destiná pa kompanianan di aviashon ku espasionan di ofisina kla pa hür. Dor di ta ubiká den besindario di aeropuerto e edificio multifunshonal aki por sirbi komo sentro empresarial pa kompanianan di aviashon.

Ekipá ku rekursonan di teknologia di nivel haltu, ta é espasio pa brainstorm, plania i ehekutá proyektonan inovativo di CAH. Aktualmente ta buskando interesadonan pa hür e edificio.

CAH tin e tarea di supervisá aktividatnan operashonal di aeropuerto, desaroyo di e ambiente rondó di e aeropuerto i desaroyonan di airlift.

Konstrukshon di e edificio ta un di e diferente plannan di desaroyo di e Masterplan di CAH. Minister Gijsbertha a splika lo siguiente di e desaroyonan: “E aeropuerto ta kontribuí grandi na nos pilá ekonómiko. Funshonamentu optimal di e espasio ta permití nos promové nos relashonnan empresarial internashonal i posishoná nos mes den merkado global. Dor di habri kaminda pa oportunidat i kresementu ekonómiko e área rondó di aeropuerto ta ofresé, empresanan internashonal ku lo establese nan mes einan, tur sorto di oportunidat pa desaroyo ekonómiko.”

CAH lo inisiá ku konstrukshon di e edificio i su ofisina den e di dos kuartal di aña aki. E konstrukshon lo dura 18 luna.



Diseño di Edificio di Ofisina Nobo di CAH

Durante e revelashon direktor di CAH señor W. Ignacio a ekspresá ku “e edificio aki ta un ángulo pa desaroyo di e área rondó di aeropuerto i un logro importante pa eksponé e potencial di e área aki. Ta un inisio ku mes-ter empoderá mas inisiativa di desaroyo i atraé proyektonan empresarial. Meta di e edificio aki ta pa stimulá aktividatnan empresarial den e área di nos aeropuerto i e diseño lo atraé empresanan lokal i internashonal.”



Revelashon ofisial di Inisio di

Konstrukshon di e Edificio di Ofisina Nobo

(Sr. Semper (presidente di Hunta di Komisario CAH), Minister di Hustisia Girigorie, direktor di Airpoprt Holding Ignacio, Minister Gijsbertha i Minister Jesus-Leito.

E edificio di ofisina nobo aki tabatin algun aña kaba den planifikashon i ta un esfuerzo di Tim di Maneho i Miembronan di direktiva di CAH, ku ta ansioso pa realisá e esfuerzo mutuo aki.

Tin 10 empleado riba e lista

Masakre di “Vieja Guardia” riba ‘Hit List’ di CTDB!

WILLEMSTAD. Informashonnan digno di krédito ku a keda verifiká pa fuentenan den seno di Ofisina di Turismo, ta indiká ku den un persona den direktiva di CTDB a keda asigná pa ‘masakrá’ e ‘Vieja Guardia’ di Ofisina di Turismo.

E ‘masakre’ lo bai kompañá pa un dil ‘caramelao’ (sic!!) konsistiendo di un ‘golden handshake’ di dos aña di salario den un tiru i despues lo mira ki más por hasi pa konvensé e funshonarionan veterano pa bai di akuerdo.

Di akuerdo ku nos fuente den turismo i ku a keda konfirmá pa nos fuente sindikal den materia di turismo i representante dje trahadónan, e proposishon ta pa ‘lay off’ sigur 5 veterano i posiblemente hasta 20 empleado di menos herarkia.

E sinku empleadonan ta hendenan ku un trayectoria impreshonante den ofisina di turismo i den e ramo profeshonal aki.

Na bon papiamentu, por a tradusi e argumento ku direktiva a usa pa ofresé e pakete ta ku “boso a bira grandi” i mester traha lugá pa personal fresku i mas hoben.

Un dje fuentenan a indiká na e korant aki ku si t’esei ta e argumento ku nan ke apliká den eventual negoshashon anto for di antemano por rekomendá nan pa lubidá e oferta.

Pasobra un profeshonal ta traha henter su bida pa na final e tin un konosementu i eksperensha sobresaliente pero no pa na ora e ta den su kulminashon profeshonal, haña un puñal den lomba serka hendenan ku ta politicamente apuntá den e kuerpo di direktiva.

NOBO tin nòmber dje personanan ku ta riba ‘hit list’ di direktiva di ofisina di turismo pero nos ke ta prudente pa publiká nan pasobra talbes nan mes no sa i e por bin komo sorpresa violento for di un fuente pafó di ofisina di turismo.

Afortunadamente sindikalismo na Korsou su bista ta



fihá riba Ofisina di Turismo e siman aki, ora ku den fin di siman e informashon a plama ku gerensia di CTB riba preshon di direktiva di CTB ku ta konsisti pa un gran mayoria di eksponentenan di PAR/MAN a duna oferta na 10 trahadó di CTB pa tuma retiro boluntario i bai for di e instituto.

Mayoria di e trahadónan aki ta hendenan ku tin mas ku 20 aña trahando na e institushon i den nan tin varios alto funshionario.

Remarkabel di esaki segun a keda informá ta miembronan di e sindikato ABVO i den nan tin praktikamente hinter e direktiva di e grupo di servisio di CTB inkluso e presidente di e Grupo di Servisio.

Segun informashonnan ku tabata skeiru den kaya, un di e miembronan di bestür hasta a bisa ku mester eliminá e grupo di servisio mas lihé posibel.

Ta p’esei mes a buska un Direktor straño ku no tin ku’nes ku kultura di Korsou i ademas no tin kuenta i rason di duna na ningun hende.

E informashon aki a shòk hopi hende ora ku nan a tuma nota di e nòmbernan ku tabata skeiru durante di fin di siman ku ta tras di lomba.

Ta di sinta wak kiko lo bai bira e desaroyonan durante siman.

Kòrsou mester hiba e polítika di neutralidat

WILLEMSTAD. Pa garantisá trankilidat i seguridat na Kòrsou, nos mester deklará nos mes ante di mundu ku nos ta praktiká neutralidat den konfliktonan i e of kuestionnan serio ku ta konserní otro pueblonan.

Neutralidat ta nifiká, apstené di un partisipashon aktivo i of duna opinion den konflikto kaminda otronan ta envolví.

Ounke Hulanda ta enkargá ku nos defensa i relashonnan eksterior, nos semper lo sigui ta hopi vulnerabel entre e potensianan grandi.

Kòrsou ta un isla ku ta abarká apénas 444 kilometer kuadrá i ku e kantidat di alredero di 150 mil habitante. Nos ta dependé di importashon i komersio for di tur parti di mundu pa nos eksistensia.

Den kaso di guera djis un bòm ku un poko potencia ta suficiente pa destruí e isla aki por kompletu. Kòrsou ta únikamente na 80 kilometer di distansia for di Venezuela. Kòrsou en prinsipio no por resistí ningun atake of

un blokeo militar.

E krísis interno di Venezuela entre tantu a kue un forma ainda mas teribel i segun kalkulo por bai tarda algu mas ku un luna pa despues kue e forma klaramente internashonal.

Venezuela tin rekursonan natural ku podernan grandi, manera USA , Union Europeo , China , India i Turkia ta hopi interesá den dje. Hopi di e podernan menshoná a invertí hopi kapital den Venezuela. Tur esakinan ta pone ku den kaso ku e konfliktonan interno kontinuá na Venezuela, mas tenshon lo surgi den e region aki.

Un bon formulashon di e kondishonnan di nos neutralidat ta importante.

Ta bon pa hasié mesora ku e otro islanan Aruba i Bonaire.

Neutralidat no ta nada nobo , Suisa a kuminsá kuné for di aña 1815 , Oustria na 1920 , Suidat di Vatikanu na 1929 , Finlandia na 1935, Costa Rica na aña 1949, Panamá na aña 1989 i asina tin mas. Tin tambe tabata praktik'é temporalmente.

UTS lo mester inverti mes tantu plaka ku e bal awe

WILLEMSTAD. E análisis ku a presentá durante un splikashon dje direktornan di UTS na Kòrsou i Sint Maarten den parlamento di Sint Maarten a revelá poko dato interesante. Glenn Carty a splika ku den e proksimo tres añanan mester inverti 349 mion florin.

Dje suma aki mester reservá 107 pa inverti na Sint Maarten i sobrá a pa Korsou.

Si logra esaki mes, UTS tin ku kompeti ku bèrdadero monster na momento ku ekonomia di Kòrsou ta manera un flèt tire i hende no tin plaka pa atkeri e servisionan nobo.

I asina mes entrada ta sigi kai pasobra no por kompara telefonia di awe ku telefonia di 20 aña pasá kaminda hende tabata paga 18 florin pa hasi un yamada pa eksterior.

Awendia hende no ta ni paga pe yamadanan aki.

Glenn Carty a ilustra seriedat dje situashon ku e frase:

“Awendia ora hende bai restorant nan no ta pidi e menu sino password di WiFi.

Pero esei no ta aliviá gobiernu dje responsabilidat di soro ku pueblo tin bon kalidat di liña di telefon na un preis rasonabel.

Si bende UTS ta haña kapital fresku pa hasi invershon . UTS no por divulgá ki balor su akshonnan tin pasobra e por afektá e ambiente di negoshashon ku Liberty.

Nan ta kalkulá ku balor dje akshonnan di Sint Maarten bal entre 37 pa 50 mion florin.

Ta bin aserka ku Kòrsou no tin mester di aprobashon di Sint Maarten pa bende akshonnan di UTS pero ku más nan ku nos warda, balor dje akshonnan por baha.

En todo kaso si Liberty kumpra UTS, e a kumpr'é ‘met alle lusten en lasten’ i ku tur kompromiso pero realmente e kaso ta ku no tin opshon: mester bende UTS.

Ku yunan di era mes:

RdK a nombra komishon nobo pa buska partner pa refineria

WILLEMSTAD. Gerensia di Refineria di Kòrsou re-sientemente a anunsiá ku lo reorganisá e komishon ku mester buska sosio interesá pa operá Refineria Isla .

E tim di maneho ku ta guia e proseso pa yega na un partner stratégiko pa Refineria Isla di tal forma ku e proseso ta keda aselerá i ku ta trese mas transparensia den e proseso ta bou di guía di sra. Evelyn Kruithof-Bor. Gerensia di RdK a tuma e desishon pa apuntá e komité di 5 persona, tur yunan di tera vèrsá riba nan tereno, pa enkabesá e PMO i hiba negoshashon ku potensial partnernan interesá den operá, manehá i modernisá nos refineria.

Aparte di Sra. Evelyn Kruithof – Bor, e otro miembro nan ta Sr. Arthur Gevers, Sr. Patrick Newton, Sr. Alberto (Chos) Romero (èks direktor di Banko Sentral) i Sra. Jessica Russel.

E PMO lo keda sostené dor tantu ekspertonan lokal komo internashonal vèrsá riba nan tereno.

Gerensia di Refineria di Kòrsou (RdK) ku e meta pa aun mas aselerá e proseso pa yega na un partner stratégiko pa nos refineria i pa hasi e proseso unu mas transparente posibel, a apuntá un komité di 5 eksperto lokal pa enkaminá e proseso pa yega na un partner stratégiko pa nos refineria.

E komité aki mesora a kuminsá traha.

Nan a sali dirèkt despues di keda nombra pa deliberá ku ekspertonan internashonal ku ta asistí den e proseso di e búskeda pa un partner stratégiko, kon ta e forma di sigui mas efektivo pa asina pèrkurá ku riba término mas korto posibel por inisiá negoshashon ku un potensial partner adekuá pa nos refineria.

Historia resien ta mustra ku e partido ku a keda skohé den promé instante komo esun pa sigui negoshá kuné a gradisí, RdK a pone dilanti ku ta sigui ku e prosedura aselerá pa papia ku potensial partidonan, sin eksklui ningun opshon.

Gobièrnu di Kòrsou ta bon kla den su enkargo na RdK esta di pèrkurá pa mantené e refineria habri i pèrkurá ku ta salbuardiá e kuponan di trabou.

Gerensia di RdK a opta pa un komité ku ta kombiná ekspertisio vasto di kada un miembro pa asina huntu nan saka lo mehor na bienestar di nos refineria i Kòrsou. Kada un di e personanan tin vasto konosementu i eksperensia i base pa ta un tim sólido ku por aktivá ku e urgensia nesesario, por kubri materianan den kuadro di realisashon ku bastante profundidat i ta komprondé e nesesidat di transparensia den un proseso ku ta asina importante pa nos tur.

Tempu ta hechu pa hasi lo korekto pa ku nos Pais Kòrsou!

WILLEMSTAD. Parlamentario Curtley Obispo den e reunion di dia 19 febrüari 2019 a trese dilanti ku tempu ta hechu pa hasi lo korekto pa ku nos Pais Kòrsou.

E la hasi esaki a base un sita (“quote”) di e lider i presidente di Sur Afrika, señor Nelson Mandela di felis memoria, nos Himno di Kòrsou i tambe nos Areglo di Estado di Kòrsou.

Parlamentario Curtley Obispo a trese dilanti ku: nos kada un ku ta biba aki na Kòrsou mester usa e tempu

ku sabiduria i semper realisá ku tempu ta hechu pa hasi lo korekto pa ku bienestar i progreso di nos Pais Kòrsou!

Nos kada un hasi lo korekto pa nos Pais Kòrsou bai dilanti!.

Hasi lo korekto pa haña mas invershonista internashonal pa mas kuponan di trabou pa nos pueblo.

Hasi lo korekto pa nos por mantené i krese nos pilarnan ekonómiko inkluyendo nos refineria, pa nos pueblo.

Hasi lo korekto pa ekonomia por krese i bin ku pilarnan ekonómiko nobo pa nos pueblo.



Barku ku ayudo humanitario no por a sali for di Kòrsou

WILLEMSTAD. Outoridatnan di gobiernu di Kòrsou a konfirmá ku e barku di bandera panameño ‘Seven Seas’ ku gruponan privá a kontratá pa hiba ayudo humanitario Venezuela no por a sali for di haf di Kòrsou. Gobiernu no a duna e opositornan di Maduro na Kòrsou pèrmit pa karga e barku pa hiba e produktonan Venezuela.

Venezolanonan na Kòrsou a yena kònteiner ku donantenan venezolano na Sur di Florida a manda Kòrsou antayera ku un avion di Avianca.

Ku esaki nan ta apoya e presidente interino Juan Guaidó i asina pone preshon riba presidente Nicolás Maduro pa e baha komo presidente.

Kapitan di e barku Seven Seas, Carlos Quintavalle, a komentá ku outoridatnan a blekia entrada dje kònteinernan den waf.

Hecho ta ku Kòrsou ta un punto sentral den e situashon eksplosoivo entre Maduro i Guaidó pero tambe entre Tromp i Guaidó pasobra Merka ta sigi fomentá pa baha Maduro.

Maduro a kalifiká e kampaña di ayuda komo un farse i preteksto pa militarnan merikano invadi Venezuela.

Di su parti Guaidó a priminti ku e ayudo humanitario

mester drenta Venezuela via Brasil, Colombia i Curazao, desafiando Maduro i e militarnan ku ta respaldé.

NADA FÒRSÁ

Gobiernu di Kòrsou a fiha posishon ku su uza Kòrsou komo haf di transito maritimo pa manda material Venezuela, Kòrsou por bira sentro di un konfrontashon maritimo.

Gobiernu di Kòrsou a bisa bon kla ku Kòrsou por ta sentro di distribushon pero ku no por manda e produktonan Venezuela te ora ku tin un ambiente di siguridat kaminda ta risibi e material.

Pa motibu di siguridat gobiernu no por pèrmiti e barku panameño sali ku e konteinernan despues ku gobiernu di Maduro a ordená pa sera frontera aereo i maritimo ku Kòrsou.

Logiko ku gobiernu di Kòrsou ke yuda venezolanonan pero sin involvi nos mes den nan pleitu.

Posishon di gobiernu di Kòrsou ta ku por manda e kònteinernan solamente ora outoridatnan di Venezuela ta di akuerdo i duna nan pèrmit.

Ningun produkto no ta sali for di Kòrsou di manera fòrsá.

Un detencion pa menasa cu arma di candela y ladronia

WILLEMSTAD - Diadomingo 24 di febrüari 2019, alrededor di 17.30 or, Polis a detené e hòmbler D.M.G. nace na Còrsou di 40 aña di edad en coneccion cu menasa cu arma di candela y ladronia.

Detencion di e sospechoso aki, pa kende ya caba tabatin un òrdo di búskeda y aresto, a tuma lugar den Roodeweg área di Otrobanda. A presentá e sospechoso dilanti di un Fiscal auxiliar cu a ordená su encarcelamento pendiente di mas investigacion.




Aksidente di tráfiko ku morto

WILLEMSTAD - Djaluna 25 di febrüari 2019, alrededor di 07.19 or, Sentral di Polis a risibí informashon di un aksidente di tráfiko ku a tuma lugá riba Weg naar Westpunt na altura di Tera Kora.

For di un investigashon preliminar ku polis a hasi na e sitio a resultá ku un outo tabata kore riba Weg naar Westpunt direkshon di rotònde di Zegu.

Diripiente e outomobilista aki a kita na su man robes pa bai pasa outo net na momentu ku un vehíkulo ku tabata kore riba Weg naar Westpunt den direkshon di Banda Abou tabata aserkando. E dos vehíkulonan a dal frontal ku konsekuensia ku shofùr di



e vehíkulo ku tabata kore den direkshon di Banda Abou a fayeré na e sitio.

Dokter di polis ku a presentá na e sitio a konstatá morto di e hòmbler

Hubert P, Adelina, nasé na Kòrsou dia 4 yanüari 1953.

Personal di Departamentu di Tráfiko ta kontinuá ku e investigashon.

Registra awo!

Manda bo e-mail na noticia@awemainta.com

Ricibi AWEMainta tur dia den bo inbox



www.awemainta.com



www.facebook.com/awemainta



583-1400



583-1444

UN GÈMBEL BISTOSO

WILLEMSTAD - Dios Tata Todopoderoso drama su bendishon riba Kòrsou i riba minister presidènt. Minister presidènt Eugene Rhuggenaath públikamente a posishoná su mes na banda di Juan Guaidó. Natural el a hasié konsientemente.

En prinsipio Ulanda ta esun ku ta bai over di relashonnan internashonal, anto Kòrsou su gobièrnu no tin nada di disidí den esei.

Ke men ku en realidat ningun minister di e gobièrnu aki na Kòrsou no tin nada di peso di bisa, tòg minister presidènt Eugene Rhuggenaath a tuma posishon i a sòru pa na Venezuela nan sa kiko ta su opinion personal pa loke ta trata e sirkunstansia interno den Venezuela. Minister presidènt Eugene Rhuggenaath no ta rekonesé e régimen di Maduro, e ta pará na banda di Juan Guaidó. E kos ei ta un gèmbel ku por sali señor Eugene Rhuggenaath i Kòrsou di BON òf di MALU.

Si Merka su intervenshonnan logra tumba e régimen di Nicolás Maduro den 1 òf 2 siman, anto mester konta minister presidènt di Kòrsou señor Eugene Rhuggenaath sigur entre e esnan ku a triunfá pa su eskoho, esta komo un di e héroenan, pasobra ta lògiko ku Juan Guaidó lo ke paga bèk na Kòrsou pa e eskoho di a yud'é bini na poder.

Kòrsou lògikamente tambe lo tin benefisionan di esei. Di otro banda outomátikamente tur esaki ta trese kuné ku esnan fervientemente na banda di Nicolás Maduro lo bira nos enemigu pa semper.

Pero, pió ainda ta si e situashon di lucha pa deroká e régimen di Nicolás Maduro dura luna i hasta aña, ya ku esei lo trese kuné ku Kòrsou lo pasa amargura.

Nos lo konfrontá ku hopi intrankilidat i inseguridat, anto sigur un ambiente hostil kousá pa ekspreshonnan di enemistat versus di nos tambe fo'i Venezuela. Nicolás Maduro, ounke su antepasadonan ta di Kòrsou i Aruba, mester skohe pa su propio sobrevivensia.

Frankamente bisá ningun di e opshonnan ariba men-

shoná no tabata na nodi si Kòrsou a asumí un posishon neutral. Nos gobièrnu simplemente no tabatin nada di deklará ku nos no ta rekonesé e régimen di Nicolás Maduro te pa bisa ku nos ta na favor di Juan Guaidó komo e presidente nobo di Venezuela.

Pa garantisá trankilidat i seguridat na Kòrsou, nos mester a deklará nos mes komo teritorio di pas, praktikando un polítika di neutralidat den konfliktonan i of kueshionnan serio ku ta konserní otro pueblonan.

Neutralidat ta nifiká, apstené di un partisipashon aktivo, no skohe partido den ningun konflikto i ni tampoko duna opinion den konflikto kaminda otronan ta envolví. Ounke Ulanda ta enkargá ku nos defensa i relashonnan ku eksterior, nos semper lo sigui ta hopi vulnerabel entre e podernan grandi i of otro pueblonan di mundu ku mas teritorio i habitá pa muchu mas suidadano kompará ku nos.

Kòrsou ta un isla ku ta abarká apénas 444 kilometer kuadrá i ku e kantidat di alrededor di 150 mil habitante.

Pa nos eksistensia nos ta dependé kasi full di importashon i komersio for di tur parti di mundu. E petroli ku refinaria na Kòrsou tin ta refiná ta bini for di Venezuela, anto pa kolmo e refinaria ta eksplotá pa PDVSA, ku ta un empresa venezolano. Nos pilá turismo tur tempu a dependé fuertemente di Venezuela, anto mas aleu ta konosí ainda ku Kòrsou ta hasiendo hopi negoshi ku Venezuela.

Den kaso di guera djis un bòm un poko fuerte ta sufisiente pa destruí e isla aki por kompletu. Kòrsou ta únika na 80 kilometer di distansia for di Venezuela. Kòrsou en prinsipio no por resistí ningun atake of un blokeo militar.

Rumannan, ku tur loke ta pasando na Venezuela nos mester siña porfin ku nos papel den mundu lo no por ta unu di mete den situashon interno di ningun pais bisiña, debí na e sirkunstansia sumamente vulnerabel ku semper bai nos lo sigui ta. E otro punto krusial ku nos mester siña di Venezuela ta ku e rikesa di e pais mester ta mihó repartí den pueblo pa evitá, pobresa, deterioro sosial, krímen i instabilidat kousá pa konfliktonan interno.

Direktor di UTS St. Maarten:

“No mata UTS i der’é den santana!”



PHILIPSBURG – Den siman ku a pasa tabatin dos seshon masha interesante den parlamento di Sint Maarten riba dos instituto di Kòrsou ku tin sosio na Sint Maarten. Den e kaso aki un di nan ta Banko Sentral kaminda Jose Jardim a splika parlamentarionan kiko ta estado di kuenta di ENNIA i e otro tabata US, kaminda e direktor di Sint Maarten, Glenn Carty, tabata presente ku e direktor di Korsou.

Carty su mensahe ne parlamentarionan tabata korto i konsiso:

“Wak pa boso no manda UTS sawaka (sementerio) i lag’é funshona komo un berdadero kompania privá”.

Carty ku Paul de Geus a papia ku e komishon di parlamento riba telekomunikashon siman pasá djabierne UTS-director Glen kaminda nan a diskuti e benta di UTS ku e kompania Liberty Latin America, un hecho ku ta praktikamente sigur.

Benta di UTS ku Liberty ta praktikante rònt i gobiernu di Kòrsou ta kla pa sera dil ku Liberty pero tin ku tene

kuenta ku gobiernu di Sint Maarten tambe ta akshonista den UTS.

Kòrsou tin 87,5 porshento di akshonnan i Sint Maarten tin 12,5 porshento.

Un dje parlamentarionan a rekonosé ku ta imposibel pa UTS hasi ganashi bendiendo yamadanan telefoniko i no pensa mes pa inverti den e kampo ei.

E tendensia mundial i regional ta pa bira un kompania di ‘data’ pasobra komunikashon verbal no ta hasi plaka mas.

UTS no por keda al paso i na nivel eksigente di awendia pasobra e teknologia ta kambia asina rapido ku loke tabata nobo djadomingo, a bira opsoleto for di djasabra. Ademas ku nos islanan no tin merkado pa hasi e tipo di invershon aki pasobra e teknologia aktual mes ta un doló di kabes pa UTS.

I mester evitá a todo kosto ku ta yega un dia ku UTS no por duna e servisio ku hendenan ta eksigi.

(Foto Cortesia: The Daily Herald)

Tempu a pasa ku por a bende UTS pa 900 mion florin

PHILIPSBURG. Durante e seshon di parlamento na Sint Maarten kiko lo ta nan papel ku 12,5 porshento di akshon den UTS, un parlamentario a splika ku UTS no tin e tipo di plaka nesesario pa inverti den teknoloigia moderno i nesesario pero si bende UITS mes, e plaka ei ta ñaña di loke por haña 3 30 aña pasá.

Den añanan 90 Antia tabatin Landsradio i Antelecom ku tabata bal 900 mion florin.

Tabatin interes na Ulanda pa kumpra e pakete pa 900 mion florin pero tur hende ku tin memoria por kòrda

kon a lanta manera un avalancha di protesta ku no por bende nan pasobra ta patrimonio nashonal nan ta.

A yega aña 2019 i nos tin patrimonio nashonal ku lo yega un momento ku ta pagadó di belasting tin ku bai supsidiá. Ningun hende den Antelecom, Setel tabatin e kapasidat pa pronostiká ki avanse teknológiko lo a evolushoná e sektor aki.

Kòrsou i Sint Maarten a keda atras i awendia e kompania bal menos ku mitar dje 900 florin pa kual por a bendé e tempu aya.

Ayera wes-komisario ta tende Theo Heyliger



PHILIPSBURG – Siman pasá djaweps Ministerio Publiko a prolongá e detenshon dje lider politiko mas popular di Sint Maarten, Theo Heyliger ku 8 dia mas despues ku nan a arest'é na su kas siman pasá na Juana Bay.

Ku esei automatikamente a prolongá su detenshon ku ocho dia mas.

E kargonan ku Ministerio Publiko ta konsiderando pa

presentá kontra e politiko ta pa soborno i labamentu di plaka.

E desishon pa prolongá su detenshon a sosodé den un seshon porta será djaweps atardi.

Theo Heyliger mes no tabata presente ne seshon pero di akuerdo ku fuentenan ofisial ayera djaluna 25 di februari mester tuma desishon si ta hiba Heyliger dilanti wes of laga.

Royal Aurora

Funeral Home & Crematory

Laga tur loke ta spera mi ta bunita
Laga tur locual cu mi encontra na caminda ta bunita
Laga tur locual cu mi laga atras keda bunita y
Laga esakinan termina den tur buniteza.
Cado Wever.

Cu dolor na nos curason pero conforme boluntad di
Señor nos ta anuncia fayecimento di:



Venancio Feliz Angela

Mihor conoci como "Felix" of "Cochise"
*18-05-1944 - †19-02-2019

Acto di despedida lo wordo anuncia despues

Royal Aurora

Funeral Home & Crematory

"Señor ta mi wardador, mi'n tin falta di nada
Den cunucu di yerba berde e ta ponemi sosega.
E ta hibami na awa tranquil,
Pa mi bolbe haña forsa".
Salmo: 23

Cu dolor na nos curason pero conforme boluntad di
Dios nos ta anuncia fayecimento di nos difunto stima:



Imelda Beatrix Weller

*10-07-1940 - †24-02-2019

Acto di despedida lo wordo anuncia despues

Royal Aurora

Funeral Home & Crematory

Ki alegría, ora nan a bisa mi:
"Ban cas di Señor!"
I awor, ata mi aki para na bo porta Señor.
Salmo 122

Cu inmenso dolor na nos curason nos kier anuncia
fayecimento di nos difunto stima:



Andrew Alexander Maduro

Miho conoci como Andy, Andruscus, Fatboy
*16-2-1978 - †24-2-2019

Ex empleado di Unicon N.V. y Universal Aviation

Acto di entierro lo wordo anuncia despues

Royal Aurora

Funeral Home & Crematory

"Bou di alanan di Dios mi ta sigur"
Abo ku ta biba bou di amparo di Altísimo, ta hospedá
den sombra di Dios Omnipotente, bisa Señor:
"Mi refugio, mi forti, mi Dios, den kende mi ta
pone mi konfiansa"
Salmo 91:1-2

Cu profundo pena, pero conforme cu boluntad di Dios :



Elvis Rosendo Arendsz

*14-05-1971 - †22-02-2019

Acto di despedida lo wordo anuncia despues

Royal Aurora

Funeral Home & Crematory

"Señor ta mi wardador, mi'n tin falta di nada
Den cunucu di yerba berde e ta ponemi sosega.
E ta hibami na awa tranquil,
Pa mi bolbe haña forsa".
Salmo: 23

Cu inmenso tristesa den nos
curason pero agradecido pa tur loke nos a comparti,
nos ta anuncia fayecimento di:



Aura Cecilia Dania

Mihor conoci como "Tante Oya"
*20-12-1938 - †21-02-2019

Acto di despedida lo wordo anuncia despues

Royal Aurora

Funeral Home & Crematory

Señor ta mi wardador, mi'n tin falta di nada;
Den cunucu di yerba verde E ta pone mi sosega.
E ta hiba mi na awa tranquil, pa mi bolbe haya forsa.
Salmo 23: 1, 2, 3

Cu inmenso tristesa den nos
curason pero agradecido pa tur loke nos a comparti,
nos ta anuncia fayecimento di:



Yolanda Margaretha De Cuba-Croes

*07-02-1948 - †22-02-2019

Acto di entierro lo wordo anuncia despues.

Ricibi Awemainta tur dia den bo Inbox

Registra awo!


Manda bo e-mail na
noticia@awemainta.com





He will cover you with his feathers.
He will shelter you with his wings.
His faithful promises are your armor and protection.
Psalm 91:4

Cu inmenso tristesa na nos curason, nos ta participa fayecimento di nos:
Mama, Wela, Ruman y Tanta Stima



Sra. YVONNE
HELEN
MARTINUS

Mihor conoci como: “Tanchi Von” – “Vontjes”
*28 July 1955 - †21 February 2019

Na number di su:
Yiunan:
Jennifer Audry Dania y yiunan
Joan Dania y Ferris Tromp y yiunan
Rubiela (Bela) Dania y yiunan

Tata di su yiunan:
Ito Dania

Su Nieto(a)nan:
Jeanmy Sint Jago, Mushaina Marchena
Ferron Tromp, Shady-Ann Tromp
Qushans Dania, Quiomar Gozalez Capellan, Q'eyon Dania

Manera un yiu:
Belinda Maduro y famia
Lisa Montero y famia

Rumannan:
Heraclea (Clea) Tromp-Martinus y yiunan
Sarita Martinus y yiunan
Balbina (Pina) Martinus y yiunan na Hulanda
Virgilio (Efe) Martinus y yiunan na Hulanda
Mario (Chomai) y Margarita Martinus-Benevides y famia

Amiganan Stima:
Zonia Werleman, Teresa Croes, Christina Geerman
(Las Pica FLOR Gang)

Coleganan y Amistadnan di Marriott Vacation Club:
Aruba Surf/Ocean Club

Comer: Marina Perez

Iha: Dashmara Dumfries

Su Comper- y comeman, ihanan, sobrina(o)nan, conociman, bisñanan

Demas Famia: Martinus, Dania, Thielman, Tromp, Benevides, Peterson, Schwengle, Monte, Fang, Mendes, Kelkboom, Becker, Jacobs, Farro, Hojer, Helmejer, Mercera, Frans y tur famia na Bonaire, Corsow, Hulanda y St. Maarten

Acto di entierro lo tuma luga na Misa Pro-Catedral San Francisco de Asis na Playa diabierna, 1 di maart 2019 pa 2:00pm di merdia, saliendo 4:00pm pa Santana Catolico na Playa.

Ta tuma Condolencia diahuebs, 28 di february 2019 di 7:00 – 9:00 pm na Royal Funeral Home – Cumana 44, Oranjestad.

Enbes di Flor, conforme su deseo lo tin un Box pa Donashon pa: Hospice Atardi – Aruba.

Disculpa nos si den nos tristesa nos por a lubida kualkier persona.

Nos ta lamenta ku despues di entierro no por ricibi bishita na kas.



Salmo: 23
'Señor ta mi wardador, mi'n tin falta di nada.
Den cunucu di yerba berde e ta ponemi sosega.
E ta hibami na awa trankil.
Pa mi bolbe haña forsa.'

Cu inmenso tristesa, per conforme boluntad di Dios nos ta anuncia cu a fayese cristianamente:

Señora Gloria
Esperanza
Carlo-Figueroa

viuda di Antonio Teófilo Carlo
*30 september 1935 - †19 februari 2019



Mescos cu yiu:Hendrik de Jesus Croes,
Fientje Figaroa, Rob Smith,
Joe Najjar y sra. y Jeff Lesker

Nieto(a)nan:Vito y Yesica, Guido y Evelyn, Giorène y Pascal,
Shanna, Jearuno y Daniela, Giovanni y Diana, Giorgine, Joseph y Celeste, Milan, Luca, Sue-Jeen y Sandrich, Dayron

Bisanieto(a)nan:Abigail, Jeliane, Aishwarya, Ailyxiara, Guido-Alessandro, Vito, Suelo, Amavi, Ian, Skylar y Giovanni Jr.

Rumannan:†Oscar y Martha Figueroa y yiunan
Carmen y Chaneko Emers y yiunan
†Marco y Elisabeth de Castro y yiunan
†Humberto y Jean de Castro y yiunan
Danilo y Migdalia de Castro y yiunan
Sandra y Anthony Owers y yiunan
†Chacho de Castro y yiunan
Bernardo de Castro y Gelou y yiunan

Swa- y cuñanan: †Charles Carlo y yiunan
†Hilberto Carlo y Candida
Norma Carlo y yiunan
†Mourien y Ronnie Poulina y yiunan
Antonieta Mutz y yiunan
Mathilda y Peppi Rizzi y yiunan
Shila Ras y yiunan

Primo-, primanan y ihanan.

Su acompañantenan: Erylin Soto y Sandia Joseph

Famianan: Mem Poppers y yiunan
†Chabe y †Elio Ras y famia
Alexander da Costa Gomez y famia
Brydel Miguel y famia
Joost y Paula Samuels-Zijlstra
Ruth Richardson-Lake y yiunan
Pedro Rangel-Wellman y famia
Vera Angela
Deulis Salazar y famia

Y demas famia:Carlo, Figueroa, De Castro, Arquez, Beck, Boekhouder, Chica, Cellaire, Da Costa Gomez, Croes, Djopawiro, Emers, Espinel, Figaroa, Fradl, De la Fuente, Gomez-Cardona, Helber, Kock, Laclé, Lesker, Lo-Fo-Sang, Marchena, Mauco, Miguel, Mutz, Najjir, Nava, Owers, Pardo, Poppers, Poulina, Rangel-Wellman, Ras, Rasmiijn, Richardson, Rizzi, Rodriguez, Salazar, Samuels, Semeleer, Sjiem-Fat, Van der Sluis, Smith, Solagnier, Torrez-Paez, Tromp, Valentijn, Werleman-Mosquera y Zijlstra

Acto di entierro lo tuma lugar diamars 26 di februari 2019, na misa Pro-Cathedral San Francisco de Asis na Oranjestad, despues saliendo pa santana catolico na Oranjestad. For di 2 'or curpa di nos difunto stima lo ta reposa den misa.

Condolencia na Aurora Funeral Home, dialuna 25 di februari 2019, di 7'or pa 9'or di anochi.

En ves di flor of krans, un donacion na Organisashon Parkinson Aruba (O.P.A.) ta wordu altamente aprecia. Lo tin un box disponibel den misa.

Si den nos tristeza nos por a lubida un persona of famia nos ta pidi nos disculpa.

Despues di entierro no ta risibi bishita di condolencia na cas.



“Señor ta mi wardador, mi'n tin falta di nada
Den cunucu di yerba berde e ta ponemi sosega.
E ta hibami na awa trankil,
Pa mi bolbe haña forsa”.
Salmo: 23

Cu inmenso tristesa den nos curason pero agradecido pa tur loke nos a comparti cune, nos ta anuncia fayecimento di:



Sr. Oscar David Daal

Mihor conoci como “Taita”

*23-02-1922 - †20-02-2019

Na number di su:
Esposa:
†Julia Olimpia Daal-Mercera

Yiunan:
†Melva y yiunan
Arcana y yiunan
Beatrix, Jorge y yiunan
Shirley
Harold y yiunan
Aubrey y yiunan
Ronald, Hortencia y yiunan
Andy, †Marga y yiunan
Ivo, Elvira y yiunan
Raiza, Mohamed y yiu
Bianca, Loesje y yiu
Zulma y yiunan

Nieto- y nietanan, bisanieto- y bisanietanan, amigo y amiganan, bisñanan y conociman

Demas famia nan na Aruba, Curaçao, Bonaire y Hulanda.

Ta invita pa acto di entierro cual lo tuma lugar na Misa Birgen di Fatima na Dakota diamars 26 di februari 2019 di 2'or pa 4'or di atardi, despues lo sali pa Santana catolico na Playa.

Condolencia lo tuma lugar na Royal Funeral Home dialuna 25 di februari 2019 di 7'or pa 9'or di anochi. Disculpa nos si den nos tristesa nos por a lubida algun famia of conocir.

Despues di entierro nos no ta ricibi bishita di condolen-
cia na cas.


AWEMainta

e corant di Toko

Tel: 583-1400 Fax: 583-1444



E unico corant GRATIS



Abona awo

Manda un e-mail na:

Noticia@awemainta.com

y skirbi e palabranan: *"Ami Kier Abona"*

Like nos riba facebook

Keda "up to date" y like nos riba facebook
www.facebook.com/awemainta



Subi riba nos website

www.awemainta.com

AWEMainta completamente

DIGITAL